


BENITO JUÁREZ

GÌTXI NUZUJA  
KIEKANBI  
BI KIA





GÌTXI NUZUJA KIEKANBI BI KIA

Andrés Manuel López Obrador  
*Presidente Constitucional de los Estados Unidos Mexicanos*

Beatriz Gutiérrez Müller  
*Presidenta Honoraria del Consejo de la Coordinación  
Nacional de Memoria Histórica y Cultural*

Adelfo Regino Montes  
*Director General  
del Instituto Nacional de los Pueblos Indígenas*

Gustavo Adolfo Torres Cisneros  
*Coordinador General  
de Patrimonio Cultural y Educación Indígena, INPI*

Víctor Martín Cérbulo Pérez  
*Director de Operación  
del Programa de Apoyo a la Educación Indígena, INPI*

# Gìtxi nuzuja kiekanbi bi kia



Benito Juárez García

Bini bidide gìtxi Didza Xtilha lu Didza Xidza:  
Nelson Martínez Pérez

INSTITUTO NACIONAL DE LOS PUEBLOS INDÍGENAS  
OAXACA



D.R. © Instituto Nacional de los Pueblos Indígenas  
Av. Revolución 1279, Col. Tlacopac,  
Álvaro Obregón, C.P. 01010, Ciudad de México.

Primera edición electrónica, marzo de 2024

Se emplearon los tipos Gandhi Serif de 11, 24 y 53 puntos  
y Gandhi Sans de 7, 8, 10.5, 24 y 53 puntos.

Traducción al zapoteco de la Sierra Norte (Tanetze de Zaragoza): Nelson Martínez Pérez  
Diseño de portada: Richi Sandoval Vasquéz  
Formación y cuidado de edición: Pedro Luis García

Se autoriza la reproducción parcial o total de esta obra siempre y cuando se cite la fuente y sea con propósitos educativos

*Editado en Oaxaca, México*



**I**za 1806, 21dza kie bio' mars, nheda gulhaja yidziluyù lu yidzi rizi'lhai Yelato', kie ikiaj yidzi Layidzi (Layetse) kie Lu'la. Nheda biti guki gunbe'kanane xuza, Marcelino Juárez lhenhu Brígida García, bini walhadzi gulhajkane ka lu Gi'a Ralha kie Lu'la, kom nhia zi yu'gara tsona izada na gulátikane, lesnha xuzatugulha Pedro Juárez lhenhu Justa López walhazi kie' xuza bentxi'ikane nheda lhenkanhu nigulha zanha María Josefa lhenhu Rosa, xuzatugulhadonhí leskare gukakane bini walhadzi. Nigulhado zanha María Longinos, bido' nigulha zi bidxinkasbi yidziluyù, buzinhubi kienhu nigulha zanha walhazi kienhu xnaa Cecilia García, kom xnaado gutinhu na bustxinubi yidziluyù. Na zi guladidizi lhatís iza gulatikane xuzagulha; nigulha zanha Josefa bitsaganhanhu lhene' tue bini Gi'abidxi (Ya'awiche) lhie' Tiburcio López; nigulha zanha Rosa bitsaganhanhu lhene' tue bini Layidzi lhie' José Jiménez, lhen udxinha nheda buga'an lhendane' lhidxe' bini bitxa Bernardino Juárez, kom yazikakane bini bitxa; Bonifacio Juárez gútie', Mariano Juárez nulhe'e' gayuble zogare' lhen xwalhidxe' lhen Pablo Juárez zíté bido' ni nhakigàre'.

Xúza biti yú, yu'u buluka'ankane kia lhen bini bitxa ruzozi ban kuinhe' lhen bitis dxindo rakigare' gunhe', lhen nheda ká guta gras lhen guki xhin lhadxidowa benha dxin

ibà, tukate guka kom ni nhakigara bido'zi. Ka ralagari kie', tutxi'ido wiajzi, bini bitxanhí rusedigarine' nheda gulhaba g̃txi, le' regaritikize' nheda tukati bayùdxi nhaki lhen tu ka dxi'a nhaki iniziru didza xtilha, lhen –tukate nhakigari banhigi kiekane bini yetxido lhen yatsari txiba nhakigarikane bini walhadzi, re'enkane gusedikane g̃txi kie yazika yelaniziru txiku nhaki le gakigarikane' bixuzi, xhi'in yudo' (ydo')– gutx̃itikize' nheda ke le' zíté re'enhe' nheda gakane' bixuzi. Dérá ledonhí re'gare nheda lhen ka, tu ka, ruyuwa ka zókanbi bi lhadza rakigarikanbi gulhabakanbi, guzujakanbi lhen rinekanbi didza xtilha, lhen kiekanbi yazikakanbi nhakakanbi bixuzi, zíté busbankani lhadxidowa bidanida guseda, lesnha na bini bitxa rulidzegare' nheda guseditu, kuinza ruwagara guba'aya lhen le kinhe' nheda txiku nizigarida le b̃sedine nheda; zan dérá yuku txxinhe' bini bitxa lhen txxinha rungara ibà yuku dzá ti guludidigari guseda tuka re'engarida. Nhaza ka, tu yidzi we'do kanha nhaka lhadza, kanis txiba ridxinkane galaj walhidxi, lhen ka nhakagari dza ga nhutu rungari bayùdxi gusedi lekanbi raban, biti skuelha nakuagarikani, nhutu rinegari didza xtilha; lesnha xuzakanbi bido dégarikiekane dumí rizilakanebi skuelha bi kiekane Lu'la ga gusedikanbi, lhen bido' ti degari kiekanbi kixhajkanbi ga sókanbi na rajakikanbi skuelha, ritxegarikanebi ilunbi dxin lhidxi bunatxi ga ka gaka gusedikanebi gulhabakanbi lhen guzujakanbi. Tuzi guní rakagari ga gusedikanbi bido', lhadza lhen leska lu dérákani yidzido kie Layidzi; lesnha zíté rilayitikizikanru yuku dzadonha, dérákanbi bi raban rungarikanbi dxin yu'ù kie Lu'la nhakakanbi bi raban, tu bini tu nigulha kiekani yidzi ralhadonhí. Lesnha, kanhí rakagari lhen ka de ruyua, klegu kom zíté rayajnhí'ida ka bini yexu, lesnha le benha nhaka bidxia ikialhowa ke Lu'la rala tsija ga ka guseda, lhen gutxitianhe bini bitxa tsajue nheda Lu'la; txiba le' nadxi'inigare nheda o bitis rizons, tibi benhe, bididize' didza ke watsajúe' nheda.







Nhaza ka, nheda ka ti riyàzigarilhadxa gusan nhanhe' yuzaa kuite, gusan nhaa lidxado ga guzua guka bido' we'en lhen bido' tuzi, lhen yuka'ankanabi xwitaj lu za'a na guka we'en kom lhen lekanbi gudzagatikiza dxi'a lhen le zian le gudidilhenkandabi, na tira suwanhí gun dani lhen yuwi'ini lhadxidowa. Zíté gudilalhenda ikiajlhowa lhen tu ka rapagara gust tsija tsajenbià yatu yidziluyù kubi, le ti nunbe'gara, ga ka gaka guseda lhen gupa'a kuinha. Le gukanha, zíté ben gan tukate re'engarida guseda kati le ruwi'ini lhadxidowa, lhen 17dza kie bio' disiembiri kie iza 1818, na yu'ugara txínú izada, gudela biruja lhidxa lhen xgidi ya'azi xgidibanzi nhi'a zayija lhatxi Lu'la, ga relhate kie dzadonha bidxinha, lhen buga'anha lhidxe bini Antonio Maza ga bi nigulha zanha María Josefa rupa'agaribi lawagu. Dzado guzuani benha dxin bentxi'kanaba buagixido kiekane, gulagixajkane nheda txopa real yuku dzá ga ka gata ledogowa, ka ants idzila kia tu yu'u ga gungara dxin. Lhatxi Lu'lanhí zogare tue' bini dxi'ado lhen bini tsowi rungare' dxin rukue' xlataj gìtxi, rudee' tuwaj tuwaj lhen udxinha runhe lhidxi. Le' nhakagare' tue bini nhutse' lu Buyuna Orden kie San Francisco, nhakagare' bini zíté bidàne' le rungare lhen yuku dxin lha'yi, ti riajtikize yuto' lhen but bidàne' gusedine' lekanbi raban. Gìtxi kie Feijoo lhen gìtxi bizuje San Pablo nhakagarikani gìtxi zíté bidàne' gulhabe'. Binidónhí lhegare Antonio Salanueva, bini guxié' nheda lhidxe lhen guxí lu nhee' isile' nheda skuelha ga guseda gulhaba lhen guzuja. Ka guka ga nheda buga'anha Lu'la na 7dza kie bio' enheri kie iza 1819.

Lu niyu'u skuelha ga rusedigarikane zi'a didza dzanha, ti rusedigarikane ka guzujaru didza xtilha. Gulhabaru, guzujaru lhen gusediru ikiajlhoru *Katesism* kie bixuzi Ripalda, leizi nhakigari le rusedigarikane na rizelhoru. Lenhi biti rudidigari zayinda guseda lhen biti rusedigarida dxi'a. Nheda biti rinegara dxi'a didza xtilha, rilsda ka rinea lei ka nhutis bini. Dérá tuka dxindo rungara lhen nudi'ini nheda lhen kanhí tibi rusedigarikane nheda, –gudidis ka

yuku dzá– kanis ruzujinida lu budapa niyepi nabiajgarikane ka rusedigarikane nhetu guzuajtu lu skuelha ga rijagara. Kun ragugariba nheda gusiudxa guzuja, nheda gunaba yuludidikane nheda lhata yuble, le bèni nheda ke guni guseda dxi'a lhen binlula. Lesnha kiajlhendane' José Domingo González (ka lhegare bini gusedine nheda), lhen le' gunabitie nheda gaxte zijalhenda ruzuja. Nheda gutxane ke lu niyepi budapa. “Wak –gunhe'–, ben litxu gulhuwinu nheda na dérakanbi gulhuwikanbi neda xtxinkanbi.” Na bidxin ori, nheda buluwidane gixi benha kanha gulanabe, zan ti biruaj kia zíté dxi'a kom ni rusedigara lhen ti nhakagarane tue bini rusedine. Zité gulhaine bininhí, lhen tibi gunie kanha tibi nhakagari dxi'a litxa, ti buluwine nheda ka gunha yuunha lei dxi'a, gútxe nheda ke ti nhakagari xtxinha lhen gusile nheda idinha guba'ya. Zité gulhaida kanhí benhe nhi, gulhairida tsaxini kati kanha rusedigarikane nhetu lu lhatajnhí tue lhai Escuela Real, kom le' dxi'a rusedigare lu yatú lhataj gayuble yazikakanbi bido', ruwigarikane lhakanbi *bido' dxi'a*, nheda lhen yazikakanbi raban yetxi –kare nheda– nusan nhakane nhetu lu yatú lhataj, ga tue bini ruwilhagarikane bini buropa lhen bini ti riyulhengare gusedine nhetu lhen nhakagare bini snia' ka bininha yatue'.

Kanhí guka nhí zíté gulhaida ka tibi rusedigarikane nhetu, lhen tira bi zógari ya tú lhataj Lu'lanhí ga tsaseda, nha gudela buruja skuelha lhen guzelhowa ruseda tugiajza kie dérá le biseda, kuinza guzelhowa ruzuja dérá le ridigari ikiajlhowa, tibi gungari txiba ti nazujagari dxi'a, kanha ni ruzujatia nadzá.

Kanha guka, nheda ruyugara ke bi zian bi raban riyazigarikanbi lhen turujakanbi yuku dzá lu Seminario –zogari Lu'la– bi rajakagarikanbi rasedikanbi gakakanbi bixuzi, lei yasnhei nheda dérá xtidze bini bitxa, le' re'engarine ke nheda gakagarane tue bixuzi lu yidziluyùnhí. Nhaza ka, dégarí didza dxi'a lu yidzi, kleguzi nhutis bini rinegari ka', leskare bini zíté dégarí kiekane dumí dzanha,



lhenka bixuzi –lhen leskare bi ti rusedinigarikanbi, bi ti nhakikanbi bixuzi– tsaxini nìzìgarikanbi, lhen rusiudxigara ke dérakanbi dxi'a rulidzìgarikane lekanbi bunatxi lhen zíté bayùdxi ruyugarikane lekanbi tukate nìzìkanbi. Dérá lenhi blaida, klegu le re'engarida gakane bixuzi –kom tibi ridanigarida ka tabize'– lei gutxe' nheda gunabane xuzabudo'wa (gate nhí ka gua lhe' Antonio Salanueva, kom le' ka bidxinha lhidxe gutxetie nheda ka bini walhidxi kie) ga ka' gudidìkane guseda lu Seminario, nheda gutxane' ke wayajlhenda lhen litxa leskare lhen dérá txxina gunlhendane kom xklenhe rune kia lhataj guseda.

Bìnhí nhakìgare zíté bìni dxi'a, kanha txi gunhia, nhakìgari bìni zíté ridanìgare ke dérakanbi bi raban gusedìkanbi, bìdàne ka rìgitajgari ikiajlhowa lhen le' benhe bayùdxi ga ka gunha, le' gutxe' nheda ke zíté bayùdxi nhakagari kom rakagara didza xidza –xtidzakane xuzaxto'wa– lhen lei gaka, kanha nuzujagarikane gìtxi kie yuto' kie Amerika, sia litxa, lhen tibi riyadzajariga txiba dé kia yú kanha tanabìgarikanebi yazìkakanbi tsani idzìla kiekànbi. Kanhi guyalhaj xniza, guyazitia ruseda gìtxi latin lu seminario, nheda guyazia ka bìni zitu, lu 18dza kie bio' oktubiri kie iza 1821, tibi nìzìgarida ka rìgitajgari didza xtilha lhen kie yazika le rusedìkane bido' na rìzelhokanbi. Kleguzi nhedazi gudìdida lenhí, leskare yazìkakanbi bi rusedìkanbi nhí, kom bitì rizayìkane gusedìkane lekanbi dxi'a bido' dzadonhí.

Kanha gukì, guzelhowa ruseda lhenkane bìni nìzìkane, dérakanè nhakagàrikane bìni xhi'ini yuto', dérá gìtxi rusedìgarikane nhetu nhakagàrikane gìtxi lha'yi. Na bio' agosti kie iza 1823 budxi kia bìseda gìtxi latin, udxi gudìdida iropatei gìtxi gulune guntu lhen dxi'a buruja lu iropatei. Izanha ti gulasalhajkane guseditu artes lhen gula gulhiza tu iza ga ka guzelhòwa ruseda filosofì lu gìtxi kie Jacquier; zan ants gula tidìgara le guluzókane kia, lhen guní gukì: udxi budxi kia bìseda gìtxi kie latin, xuzabudo'wa gutxe nheda ke riyazìlhaxè ke nheda txàzia teologì kie

bini, ga ka iza za' selhòwa sià lhen gunhidzaja xanru. Kanhi gutxe' nheda ti gùzilhàdxà, kom ti ridanigarida gakane bixuzi lhen ti ridanigarida kom yuku bixuzinhí nunbegarikane lekane ke tuzi le ridanikane nhaki gusedikane gìtxi latin lhen teologì kie bunatxi, lesnha ruxhìdxigàrikane lekane na rulídzikane lekane kamod “bixuzi mis lhen bixuzi yúsu o Laragi”. Rizigarikane lhakane bixuzi mis kom, tibi nizigarikane, tuzi le tunhe nhaki mis ga ka' gata le ilàgukane lhen ti rudidigarikane guwikane didza la'yi o yatú dxindo, kom ni riyadzajgari kiekane inízikane; lhen re'garikane lekane kamod “Larragi” kom tuzi le rusedikane nhaki *Teologì moralì* kie bixuzi Lárraga. Ka gúkaza gutxane ka' xuzabudo'wa ke ti riyàzigari lhàdxà, nheda gútxane ke ti yu'uinda iza ga selhòwa dxin bixuzi lhen tibi rinhi txiba nheda guseda artes. Dxi'a guka kia kom lhen yuku xtidza bisayajni'idane lhen le' bidide nheda tsiajlhenda guseda gìtxi, kanha re'engarida.

Lu iza 1827 budxi kia biseda artes, udxi gudida txopa dxin guluzokane kia tida lhenkane bunatxi lhen udxi gudida gìtxi guluzókane kia ka, ga buruja dxi'a lhen déràkane gùzalhàdxikane lhen yazika didza naba'a gulunkane kia bini guludzátsikane lítà.

Lu izanhi ka' gulasálhajakane gusèditu gìtxi kie teologí lhen guzélhòwa ya tsalha'ani gìtxinhí, kanha re'engarine gunha xuzabudo'wa, lhen kanhi gukanhi lesnha le' tirabi gunhe' lhen tira bi gùtxè nheda gakítiane bixuzi.

Lu dzadonhi ziani ledó txi guladidigarikan lu lhatxi lhaxiru xinnhi. Guzó yelaudila yula'akuinru lhenkane bini xtilha, txi guzélhògari lu yidzido rizilhai Dolores rela kie 15dza kie bio' septiembiri kie iza 1810 lhenhe bixuzi lhégare Miguel Hidalgo y Costilla lhenkane bini walhadzi, gulagiélakane ya', yaga tùtxi lhen yaga –lhen nayitxi'igari dérá gi'a dxila walhaze' Vicente Guerrero–, le budxi ga gulunkane gan bini biyú' ridazikane tuzi, lhen bini nha'yajgarikane generalhi Iturbide, Bravo, Bustamante lhen





yazikakane ka, gulunhi kiekane Lhatxi xhin kie bireinato lu 27dza kie bio' septiembiri kie iza 1821. Udxinha Iturbide, gudidine beyi kom dérákane bini zógarikane lhow gulalháikane le' xhin, guludide siè xlataje' lhen le' bènizi le' ke tugíjaze benhe ga gunagan tuidú lhadziru, le' bizue' lhe' ka Bini lhow kie Zagita (Mèjiku), tibi bènì le' bix kos inákane bini kie Partidì Republicanì lhen ti bìdanikane bini Partidì Monarkistì, kom lekane re'engàrikane kwekikane lu xlataje Moktezuma, tue bini lhow kie Yu'u Borbón, kanha guluzújakane lu gìtxi *Tratados de Córdoba*, gìtxi lu mism Iturbide guxi lu nee lhen udxinha bubige lhen bugue' yelanhali kiei.

Katis guka, tibi gulanhakane bininhí, lekane gulazelhókane rupa'àkane xtxinkane lhen tugunkane dxin ka tunakazikane lhen yelarudzaj kie bunatxi –bini tibi rinagàrikiekane gudzátsikane le raki, o bix kienha ka raki lhen yuku dzá rudzijazikane na taruaj ledó nhaka kubi lhen le run ga rubanikane–, lenhí ben ga dérá bunatxi gulazókane dxi'a kie dzanhí gulazelhó, ke tuze Iturbidenha dégari dérá lu nhee. Lhen guní guka na gulayase bunatxi lhenhe bininhí, lhen gulalísikane le gulue lhai Repùblika, le ben ga Iturbide buka'anhe xlataje', lhen zayije kié lu lhadziru xhinnhí. Lesnha gululídzikane dérákane bini yidzi ga yuluzókane diputadì kiekane lhen bini zíté gàlì xtídzakane, ga ka' ilízikane lhatxi lhadziru xhin kanha nazujagari lu gìtxi kie independensia, Yelali lhen Repùblika, zi guluzókane xlataj; udxì yuku yidzi guluzókane bini nhalikane lu tuwaj lhàdzikane, gultubi kuínkane bininhí guluzue' lekani bini yidzi gatsajlowi kie yidzi lhadziru xhin, nha gulazelhókane gulabekixbákane ka rala zue' gobiernì. Lhadaj kanhi rakagarinhí, Iturbide budxinhe lhadziru lu Soto la Marina lhen nha' gulazínkane le' lhen gulatxugíkane ikije' kom runganigare yuku bunatxi. Lu Kongreso ni ribekixbàgàrikane. Bini nhutsigarikane lu Partidì Monarkiko Konservadorì, bini gulunkane ga yuruje' xlataje Iturbide kom ti ridanigarikane ka gulíze bininhí klegu kom

ridzagigarikane dxi'a lhenkane bini Partidì Republikani, txi nádùbigàrikane lu le gulue lhai Partidì Eskoses lhen rungàrikane dxin lu Kongreso kom re'engàrikane gùni kiekane dérà lhadziru lhen re'engàrikane yuluzóbánkane bini zíté dékiekane dumì, tibi rùnilekane txiba guladidikane beyi lhen txiba guluzókane ban na gulazue' birey. Walhazi kiekane na'a, bini Partidì Republikani re'engàrikane gutubìkane dérákani lu tuzi yidzi lhen ke lu Konstitusion kubi guzujakane yelalí lhen ka só dxi'a yidzi xhin kie republika kiei Estados Unidos kie Ralha. Zíté guladidine ga ka' gulabékixbákane, kleguzi lu Kongreso, bini yidzi lhenka zurá bini ruzujagàrikane gítxi zi gularuájkazi, lhen ka budxi na'a, gulunkane gan bini republicanì fedérálist ka kí'xbá kie gobiernì, kom gulusan nhakane ga dérà gobiernì tuzi ga idubi lhen walhazi nha guluzókane tu gobiernì kie dérà lhadziru xhinnhí, kiekane bunatxi lhen kie déráru; zan txiba guyùru dxi'a ka gurixbákazi, bini gulunhe gan gukìkakane bini sentralist, kom lu gítxi Bìkugu Lí Lhow kieru guluzújakane ke tuzi ka rala tsajlheru, nhutu bi rala bi gun kie lekane bini dégari kiekane dumí, guluzókane tuzi komandansi generalhi lhen ziáni yazika didza rugapa yelalí lhen kie déráru bunatxi ka gula yuga'ankas. Gítxi Konstitusion kie iza 1824 guka tu gítxi bidìdì sáyinru lhati ka yidzi lhen udxinha bubì'iru, gítxinhí ti guka xkugi ga déraru sógarìru dxi'a lhen ga déraru ségarìru ka inazi kieru ri'o bini yidzi, tuzi gukì ga guluwátsaj dérà le ku nhakigari dxi'a le txi gudìdinìru ka Yidzi Xhin, lhen gunì zi tìdinìru txiba ri'o bunatxi ti tsayajnhì'iru dxi'a le rakì lhen ga gunru bayùdxi ga dérà bunatxi tuzi ka gálikane lhen tuzi ka rala gakahenru lhadziru leskare lhen ri'o lhen nhutis bini yuladidikane lu lhatxi lhadzirunhí, ga nhutu bini gaki kuine xhin, ga ti gata fuero, ga klegu tuzi bini gùni kie dérà lhen ga nutu si'gidza ri'o; txiku yugókane dérákani gítxi nuzuja lhadziru Mèjiku lhenkani yazika yidziluyù, gítxi nhí tibi nhálikani na gítxi lí kieru lu Republika gunhìdzaj yelasókane dxi'a lhen dérákani deretxi kiekane bunatxi





lhenkani yidzi, nhutis bininha, txiba gunkane bayùdxi yuku deretxi kie Mèjiku, justis kiei lhen zurá gìtxi lí kiei; ka nazujazi lu didza, zan ka ruúdxì na'a lu Repùblika tuzi le nakua nhaka leizi lhen tuze autoridà: autoridà kie bunatxi ruzókane ka rinakane dérákane bini yidzi, ga ti nakuakani ka rajlheru lhen ga nhutu bini nakuakane ilunhe justis lhen nhutu bixuzi nakuagàrikane guzólekani ban, yelarinabéyikane lhen na tadidikane beyi guluzókane lhow kati le nhalizi ka dérá bunatxi, gulagókane dérá fuero kiekane lhen ga ilunkane le rinazi kiekane lhen guluzókane lekane ka rinazi kiekane.

Bini kiei Partidi Republikani gulazí'kane lhákane udxinha kamod Partidi Yorkini, ganí gulazelhókane guladilakane tinzi lhenkane bini Partidi Eskoses, bini rugielagàrikane dérá le txi guka lhen na guladidine beyi, lhen bini Partidi Yorkini na'a re'engàrikane sóru dxi'a lhen sóru ka rinazi kieru; zan bininhí yelaudila kiekane ti rizógari tsustu kom, nhutu bisedi lekane bunatxi ka rala gaki lhen tsayajnhí'ikane dzadonhí, bini zógarikane lhow –bini dxi'a lhen bini zíté nhalikane– ti nhapagàrikane zíté gusti ga yuku xtidzakane gun gan, kom ti rajnhí'igarikane dxi'a yelalí, ka gusaru lhàdziru lhen tsatinizi ruka'ankane xnizakane nha' ratá'kane yazika bunatxi, le rungari ga bini rakalhengàrikane ti sáyikane lhen ga ti gunkane gan lhen guní rutsáikane ga gata kieru yelalí lhen ka gusaru ka zòru. Dérá lenhí rakigari kiei dérá Repùblika lu iza 1827.

Le rakigari lu lhatxi Lu'la, ga zógara, rakagari rilayitu, zan ti rakagari tukate rixizi lu yidzi xhin kieru. Gulutubi kuinkane Kongreso Konstituyente ga gulabije' Gìtxi xkugi kie Lul'a. Bini Partidi Liberali lhen Retrogradí gulazí' lhákane tuwiajkane, tu kíkane guluwi lhákane *Binagri* lhen Zà bini buropa. Iropatekane gulunkane dxin ga yulabékikane diputadi lhen senadori yulatxízikane Kongreso Konstitucional. Bini Partidi Liberali gulunkane gan kom guluzókane bini zían diputadi lhen senadori liberali, lenhí ben ga lu Kongreso gatagàrikani gìtxi xkugi

kie yelalí lhen gítxi gusáyinu ka só bunatxi, bunatxi zozigàrikane kazi tibi nizikane, tuzi ridanigàrikane tsiajkane yuto' lhen le rusakayáyigari lekane. Le gulunkane dxi'a ga bunatxi sókane dxi'a, lhen le bèn lekane xhin bini nakuagàrikane lu Kongreso guki na guluzókane ga iladube bunatxi –le guluwikane lhai kamod Instituto kiei Siencias lhen Artes– tibi rungari txiba bini zógarikane lhow nhakigàrikane bixuzi lhen txiba nhakigari ga gusédikanebi bi raban lu zíaní xnízi yelaníziru ka bunatxi, le nhakagari zíté banhigi gusedíru lei lu lhatxi Lu'la ga tuzi lhataj zógari ga gusedíru nhakigari Kolegio kie Seminario Konsiliari (ga tuzi le rusedigàrikane ri'o nhaki ka rigitaj didza latin, filosofi, xkugi filosofi lhen xtídze xànrú); lhen txiba re'engàriru gusedíru le yuble klegu lení, o bitis yazika dxin le re'enru gusedíru dxi'a, ralagari gata kieru tsaxhíni dumí ga ka gaki tsijaru Mèjiku tsasedíru, o bitil yaturi yídziluyù yuble ga gaki tsasedíru lhen iníziru dxi'a le re'enzíru o le idàníziru. Bini yetxi ka nheda, tibi dègari le gunha ga idéla kia.

Na gulasalhajkane institutonhí lu iza 1827, doktori José Juan Canseco, tue bini bisee gítxi lí kiei lhatajnhí, biè didza lhen le gulasálhájkane institutonhí, ga zíté ble'e tukati nhaki bayùdxi gusedikanbi raban lhen tu ka nhaki bayùdxi ga yu'unhí gunhida bitis gítxi ridanikane gusedikane, ga nutu gusedika tuzi klas gítxi. Ka gudídi dzanhí, zíanikanbi bi rusedigàrikanbi lu seminario gulayázikanbi lu institutonhí. Guka guní o guka gunila, lhen yelanhia nhí, o le ben xtídze doktori Canseco, o kom zíté ritxidxigàrida guseda teologí kom ti rajnhí'igàrida dxi'a ka nabeki xkugi, o le zíté ridanigàrida guseda le yuble nadzalí kie le gakane bixuzi, le nizigàrida nhaki ke ti zògara gusti, ti ridanigàrida guseda teologí, ga gudida udxi bisiúdxà filosofi. Lhen udxi zíté le gudídida lhen gítxi kie estatuto, biàne xklenhu bini rusedigarine nheda lhégare Luis Morales, lhen nha' gudida guzelhòwa ruseda gítxi lí lu bio' agosti kie iza 1828.





Bini zógare lhow yu'unhí lhen dérákane bini rusedigàrikane nhetu nhakigàrikane bini nhútsíkane lu Partidí Liberalí lhen bininhí rugútsigàri kuinkane lu dérá dxin kie bi rakigàri Lu'la. Kanhí guka nhí lhen zíté naki bayùdxi iniziru nhaki kom bixuzi lhen yuto' blui lekane ke lhataj kubinhí ga gusedíkane le yuble –ga nhetu rudzagàri galhaj yalhaj ikiajlhoru lhen ga dérá bunatxi inizikane le nhaka dxi'a– lekane gukibeyikane (kanha gukakaz) ke lei yukinaj dérá le txi bidélikane gate nadzà kie tukate gulaziyéyikane; kanha guka ga gulazélhókane udila lhen institutonhí, gulugunkane dxin tukati zíanikane bunatxi ni rajlhegàrikane lhen lekane, ke ziani walhidxi ka lhen lu dérá yelanaban kiekàn bunatxi. Guluwikane lhai institutonhí kamod “yu'u gagei”, lhen bini rusedíkane lhen bi raban rasedíkanbi gulíe lekane “bini tibi rajlhekane” lhen “bini udadzagi”.

Xuzikanbi bi raban ti re'engàrikane isílakanebi gusedíkanbi bi kiekane lu institutonhí, lhen lhátistu nhetu rijagàritu nha ti ruyùgàrikane nhetu dxi'a lhen bini zían tira gululídzikane nhetu, kom ni ku nízikane bix kienha lhen ribízikane ka dérákane bunatxinhí ti ralhaj ikiajlhókane. Zíanikanbi bi xkompa gulurujákanbi kom guládxíkanbi dérákane bininhí dxégàrikane nhetu gi'. Làzitu buga'àntu ruúntú xhìn lhatajnhí, lesnha yuku dzá rijagàritu raseditu.

Lu iza 1829 guludidikane didza ke txi za'gàrikane yuble ga iluní kiekane lhàdziru bini xtilha zaka Istmo kie Tehuantepec, lhen dérátu nhetu rusedigaritu lu institutonhí yazó kuintu lu gítxi lhenkane bini snia, kanha guka guluzókane nheda ka tenieti kie tu kí'kane bini nadùbigàrikane ga gudzàgatu ti iluní kiekane yuble lhàdziru. Lu iza 1830 guxhi' lu nhaa –tutxi'izi–, gusedida fisika, ga gulagíxhàjkane nheda txiún pesi, lei gukalhen nheda gudìxaja dérá le riyàdzajgàrida. Lu iza 1831 budxi kia bisèdà gítxi lí lhen gudida runha dxin lu bufeti kie Lisensiadí Tiburcio Cañas. Lu izanhí guluzókane nheda ka



regidori kie yu'ulhówì kie Lu'la, ga dérákane bunatxi ka gu'un Kane, lhen nheda guzua' lhow dxin kie fisika benbi bi bisedabi lhégàribi Francisco Rincón lhenkane bini nhútsagàrikane lu Kolegio kie Seminario.

Lu iza 1832 guzelhó udila lhen ka rungàre dxin lu gobierni kie president kie Republika, Anastasio Bustamante, bininhí guri'dxi gobierni kie lu izanhí lhen dérákane bini nhútsagàrikane lu Partidi Eskoses nuzógarile ban. Na zi guzelhó iza 1833 guluzókane nheda diputadi kie Kongreso kie Lu'la. Kanha nazuja lu Gítxi Lí Rubiaj lekane lu Yidzi Bini Xtilha guluzókane lu Kongreso Generalhi, obispi kie Lu'la, Manuel Isidoro Pérez, bini ti nhúsigari lhe' lu gítxinhí, tira gu'unhe gusee dxin lhà'yi kie lhen gudele zuwije yidzi Xtilha. Na nitùè bixuzi obispi ruga'anigare lu lhàdzirunhí, kom lhatizikane bini nakuagàrikane gula giele zàwàke yidziluyù yuble, ti nhakagari tsatinizi txiba nu re'engari si' xánkane o didza lhà'yi lhen tuzi gaki si'kane lei txiba rajakigarikane La Habana o lu Nueva Orleans, lhen ga idxinkane yidzinha riyadzajgàrikane tsaxhini dumì, dumì le ku dègari kia. Zíté dxi'a guka kia kanhí rakagàrinhí, kom xuzabudo'wa –le numbe'gare ke nheda ti re'engàrida gakane bixuzi– bidídé tsiajlhenda lhen gítxi lí. Gate dzadonhí raskieza ruzógara kuinha ban lhen dumido rungara kia gan.

Lu izanhí guluzókane nheda gunhane yudari komandati generalhi Isidro Reyes, bini bugiele ye'yi lhenkane bini natxègare generalhi Canalizo, ka nazujagari lu gítxi *Plan kie Religion lhen Fueros* (le guzelhówe koroneli Ignacio Escalada kie Morelia). Gate dzadonhí, bini nhútsagàrikane lu partidi klerigo-militari gulazelhókane ruzó kuinkane tsutu, gulazelhókane udila lhen gulutxíza kuinkane lhen fuero kiekane, na guladidikane beyi lhen dérá ka guludzágakane só dxi'à lhàdziru. Le gudìlhaj lhádxíkane yulayáskane udila bini dègari kiekane dumì guki le gusalaj xnizi zi'à kié partidi liberali ga gulazelhókane xnizi kiekani



Reforma, ga gulagókane yuku gítxi lí rudidigari lekane ilunkane ka rinazi kiekane na lafuers rungàrikane ga dérákane bunatxi guntxi'ikane yelalha'yi kie yuto' lhen ga yulagixhajkane dumì yuku dzadumingu.

Lu iza 1834 benha lìtxà rudzàtsikane kie gítxi lí jurisprudens lu Korte kie Yelajustis kie Lu'la, lhen nheda gudídá, ka guki nha' lekane gulunkane lìtxà ga nazuja ke txi nhakane abogadí. Na zi guladídizi lhatís dzá, lu Legislaturi guluzókane nheda ka tue magistràdí walhazí tutxi'izi lu Korte kie Yelajustis, ga tuxi'izi gurià lu xlataja. Tibi ben kanha bíè didza Escalada, bini benhe le' tuzi Arista, Durán lhenhe Canalizo, dérà gulagókane lei lu iza zi gudídí [1833], bini gulutákane dérà dxinnhí guyajlhenkane lhen ka budxi, bidélíkane dérà le re'engàrikane, lesnha lu iza [1834], gulukinajkane gobierni kie Valentín Gómez Farías. Bini zían zógarikane lu mism partidi kie gobierni gulunkane yudari, kom ti gulayajnhí'íkane dxi'a ka rala kitaj lhen kí'xbà yelarula' kuinru, kanha gunhia ants, nadzúdis lhókane tadagàrikane lhen bidxiga lekane dérà tukati yeladxégàrikane dí' dumì, le yuka'ani kiekane dumí o le zíté riláyíkane. Kanha guka buginaj gobierni kie Lu'la, ga rungara dxin, nha' gulubiájkane lhen gulusije nheda Tehuacan, ga tibi benha, ga tuzi le benha nhaki zíté benha dxi'a xtxinha lhen yeladxi'a guzua lu lhataj gulune kia lu gobierni kie lhadza.

Udxi gulugókane lhen gulubiájkane nheda ga nukatxigàrikane nheda, bubí'a Lu'la lhen benha dxin kie le biseda. Ni nakuagàrikane dérákane bixuzi lhen dérà le rinabe'gàrikane lhen ka rùnì kiekane dérà, lhen ka ridzagagàrikane dxi'a lhenkane bunatxi rungari ga yulanizi kuinkane xhin. Fuero kiekane rigielagàrikane ga rinabéyíkani gítxi lí kiekani Trinunali Komun, lei rugungàrikane dxin ga tibi gun kiekane gítxi lí lhen lei rudidigari lekane ilunhe le rinazi kiekane lhen dérà xgia' rudxégàri kuinkane. Dérákani dumí riyàzigàri yuto' tibi tagixhajgarikane lu yidzi; dérákane bixuzi rizi'gàrikane



lháxhájkane tuka rinazi kiekane. Nakuagàrikane lha'kane bixuzi dxi'a, bini ti tadidigàrikane beyi si'kane lhaxhajkane lhen ti tadidikane beyi lhenkane bunatxi; zan la'zikane bini dxi'anhí nhakikane xhi'in dios, lhen kanhi tabizigàrikane, ti gukikane yugókane yelaguxgié kiekane yazike, le guka nha, bixuzi dxi'adonhí guludzátatikizikane lekane kanhi tabize lhen re'gàrikane lekane *ke ti rusedigarikane dxi'a yuku bini yidzi lhen tunditajgàrikane nidxilha kurati*. Ka rakagari, dérákane bunatxi ruwi'inigàrikane kanha tudzágakane lekane lhen dérá yelayètxi rididigàrikane, kom dérá txinkanedo, dzado kiekane lhen dxinlhowi rungarikane..., dérá lenhí, dxin rungàrikane nhakagari ga zózikane dxi'a tuzikane bininhí rizilháikane *bini bixuzi*. Txiba lekane ranabigàrikane gaka justis, ti ruzenhagigàrikane lekane, lhen tuzi le rizi'gàrikane nhaka yulazigìdzakane lekane o rizilakane lekane lhidxi gié. Nheda gudidida lhen bilhayida dérá ka tusakayáyikane bunatxi. Bini yidzi kie Loxicha gulídikane lhen nheda ga ka tsajía kuenti kie dérá le rididigàrikane lhen ga gata kiekane lhataj yulazí'kane deretxi kiekane lu Yu'u Xhin kiekane bixuzi kanhi tabizikane bixuzi kiekanenhí, bini tanàbitíkizikane lháxhájkane lhen yazika dxin re'engàrikane ilunhe bunatxi lhen lekane ga ti nabekixbákane le tuka' rala si'kane. Kanha guka gudéla benha xhin lháxdíowà ka rakagari kiekane binidonhí lhen kanha biyua dérá gítxi gululhúwíkane nheda, gudéla guyíja lu tribunali, ka ruwigàrikane lhai. Lhen kanha nheda nhakagàrane diputadi lhen kom Lu'la nakuagàre gobierni liberali (kom dérá lenhí guka na zi riselhózi iza 1834), guyázi dérá lítxà lhen le gunàba lhen gulasíákane gítxi kie bixuzi ga tsijè tsayuè lekane lhen tsatixji'ine kie dérá kani rungàre lhen rudidigàre bunatxi, lekane gutxikane le' ke ti ralagàri wije' lu yidzidonha gate udxitei dérá juis tidine lhen le tanábe kie dérákane bini yidzi; zan kàzi gudidi kom zi guladidizi lhatís bio', buginaj yuble gobierninha, lhen kanha txi gunhia ants, yuku bixuzi (guladílakane ga dér



idza') bululíza kuinkane zíté xhin lhen tibi beni lekane –dérá bunatxi lhen yeladxi'a kiekane– gulazelhókane tabizigíxíkane ga tuzi lekane gaka kiekane le dxi'a. Juezi kie yuto', ti bidide udxigari gaka justis gunaba kie bixuzi kie yidzi Loxicha, tibi benhe bayüdxí lhen guxiè kuenti dérá xtidze lhen ti bidide guwikane didza dérákane binido riláigárikane, guxiè gudele buzue le' lu xlataje bixuzi kie kuratinha. Bixuzinhí ka bu'è yidzi kie Loxicha, gusìle lhidxigié dérákane binido gulazókane le' kontri lhen kanha bidzàgine prefekti lhene juezi kie partidí, gulagú'úkane lekane lhidxigié lhen ga nutu guludide guwilhen lekane didza. Bixuzinhí yatele gìtxi kie autoridà kie Lu'la ga ka sànkane lekane dérákane bini lhen yulagú'úkane lekane lhidxigié dérákane bini yidzidónhí yayúkane nheda siudá, o na yatílhajkane le' yatue' abogadí galkhene lhen lekane. Lu dzadónhí kiei iza 1834, nheda rulhuwigàrida gìtxi lí kie yuto' lu instituto, lhen ti rakagàra gudida dérá le ku rakagàri justis lhenkane binido tide lhen nheda, kanha guka gunaba kia ziani dza lhen gudela sayija lu yidzido kiei Miahuatlan, ga nagú'ugárikane lekane lhidxigié, lhen guní gakkane yuruajkane lhidxigié. Ka bidxinha lu yidzidónhí, yayuànhe juezi Manuel María Feraud, bini dxí'à guxhiè nheda lidxixlàtaje' lhen bene nheda lhataj guwilhénkandane didza binido dzi'igárikane lhidxigié. Nha gunàbane kixji'ine nheda bix kienha dzi'igárikane nha' lhidxigié binidónhí; le' gútxe nheda ke tibi giè'gare nheda kom ralagari gukátxe didza bix kienha dzi'enha. Nheda gunàbane gulhàbe kia gìtxi nagu'ù lekane nha binidónhí, ke ti ralagàri gukátxe lei kom txi gudidi tiempi kiei tukate dzá nazuja lu gìtxi lí. Ti gu'unhe gunhe kanha gunàbanha, lesnha gudéla gútxane ke nheda tsajía kuenti lhen tsaxua' gìtxi buropa dzà ga ka' gata kie lhataj yugixji'ine nheda lhen gìtxi le rala gunha ga yuzí'kanane dérákane binidónhí lhen yulazìe justis. Buropa dzà yaxua' lítxà, kanha gútxane; zan juezi zíté txi nutságare: guxiè nheda lhìdxè ba sniáda lhen gunàbe nheda nhux nhakagàra lhen bix kienha rutàgara



gìtxi walházkane binidónhí; nheda gútxane ke nhakagàrane tue' abogadi numbékane nheda lhen txibà nheda re'engàrida guà didza walhàzi bini yétxídonhí, tibi gítxi riyàdzàjgàrida ga ka gunha yuzí'kanane, le' gutxe nheda ke tira bi didza rala guà lhen ke rala gìdagàra yuble dzinhí lhen le' ga rala guà didza lhen le' ants selhókane ilunhe justis kontri nheda kom ridàza ka' rigílhaja udila. Bixuzi gudilaje' dérá txi zógare yuble lu yìdzidónhí lhen prefekti rungàre dérá le rinàgare bixuzinhí, gùdxìda bi ilúnkane kia lhen bubí'à Lu'la ga tsajía kuenti le runhe juezinhí lu Korte ga tunhe Yelajustis, lhen ka benha; zan leskare ti guluzenhájikane xtidza kom lu tribunalhínhí nakuagàrikane ka bixuzi. Ka guka ga gulayéyájkani dérákani puerti ga yulazí'kane justis binidónhí dxi'igàrikane lhixigíé, binido tibi gulunkane xgia', tuzi le gulunhe guki gulalízikane xtidzákane kie dérá le rungàre lhen ka rididibèyìgàrine bixuzinhí. Bixuzinhí ti bizódxie' tukate gudxie' nheda gi', ka tabízìgàrikane dérákane bininhí da'gàrikane lu yuto', ti gulhéki le' dxìzi dérá le txi benhe lu tribunali, leskare guri'nisane nheda lhen zítè guxhigìdzane nheda, lhen ga gaki gune guní benhe bayùdxi ga juezi Feraud guzuje' gítxi gudzàga nheda, lhen gusile lei lhenhe juezi kie lhàdzìru xhìn, ga ka gulazìnkane nheda lhen yulagú'úkane nheda lhixigíé lu yìdzi kiei Miahuatlan, lu gítxinhí guluzujàkane ke nheda ridàgàra lu yìdzi kie Loxicha rungànìgàrikàndane dérákane bini yìdzi ga sókane udila lhen autoridà, ìlhen nheda ga zítúté lu siudà ridàgàra kie yìdzinha, ga nheda gatiga guyíja!

Juezi kie lhàdzìru xhìnnhí –bini zógàre lhene bixuzinhí–, gítxi buzujàkane ti nazujagàri kanha riná gítxi lí kieru, guludìdikane lei lhìdxà gatsalowiyèlha lhen gulatxékane nheda lhixigíé, tibi didza gutxíkane nheda, gulünze ka nazujagàri lu gítxinha ke yulatxé'gàrikane nheda lhixigíé kie Miahuatlan. Leskare gulatxe'kane le' lhixigíé lisenziadi José Inés Sandoval, bini gukalhenhe lhenkane binido na'a ni dzi'íkane lhixigíé.



Zíté nakibégàri déra tukate riziyéyíkane kie xgia' ruda'yígàrikane nheda lhen dxi'à nalha' ke ti tunhe kia justis, lei beni nheda ke Tribunalhi Superiori, ga guyìjà yaxua' kuenti kie dérá le rusakagàrikane nheda, lhen gukida nheda ke tsatinizi yulubiájjkane nheda lhidxigié; zan ti guka ka, nheda gutxíxida, gulubijákane nheda lhidxigié na guladidi ga dzá udxi guxua' dumí, lhen gatiga gulugiélakane xnizi litxà lí gulíza lhen dérá gítxi yaxua' kiekane juezi guladidikane beyi lhen nheda.

Dérá lenhí gudidinida, lhen ka ruyùgàra yuku dzá rizákákane dérákane bini yétxido tanàbigàre justis lhenkane bininhí tunhe ka rinazi kiekane lhenkane autoridà kietu rudidigàrikane lekane, lei bilhuwikani nheda tukati ruzóbaga lekane bunatxi ga ti sókane dxi'a kanhi tabizikane bininhí na ridzágákane dxi'à lhenkane bini rala ilunkane justis kie yidzi, lei guluzókani nheda tsutsu ga gunha dxin yukínaja dérá le rudidigàri lekane bini yulabizikane ka rinazi kiekane. Ka benha tukate guka lhen ka gunkane ka' bini kiei Partidi Liberalhi; zan yelakuraki kie dxi'a bunatxi, rumedi rala kwekidxigàri lhen dérá ka rakagàri dzadonha ti gusiùdxi lhen gá'ani dérá lhui le malinhí, zianilzú gulajtu lhui kiekani gobierninhí tudzàge sa' lhàdziru lhen rutsatu lei lhen yazika le kwekixbà, tùzi le rutsa'gari nhakagàrikane bini lhen lu dérá yuku gítxi lí ni nazujagàrikani dérá deretxi kiekane bini nakuakane lu yuto' lhen kiekane bini snia', ti rudidikane nu iné kiei yuto', yuto' kie Yidzi lhen tukati yu dègàri kiekane bixuzi (lhen le rudidigàri lekane tidikane bèyi ga ka ti gusànkane dérá le dègàri kiekane). Ka guka na zi guzelhókazi ribekixbà gobierni liberalhi, na zi rididigàrizi lhàtis bio', yuble ribi' dxí lhen tabienisakane dérákane bini tadúbe yùble.

Gate lu iza 1839 lhen iza 1840 zíté benha dxin lhen dérá le txi biseda. Lu iza 1841, bini Korte kie Yelajustis guluzókane nheda juezi kie primeri instans kie bunatxi lhen ga gudítajda dumì kie Lu'la.

Lu 31dza kie bio' juli kie iza 1843 bitsaganhaa lhenu Margarita Maza, nigulha xhi'nhe Antonio Maza lhenu Petra Parada.

Lu iza 1844 gobernadori kie Lu'la, generalhi Antonio León, bene xlataja ka sekretari kie gobierni kie, lhen leskare guluzókane nheda bocali suplenti kie Asamblea Departamentali. Na zi guladidizi lhatis bio' guzelhókane ruúnkane kubi dérákane magistradi kie Tribunalhi Superiori kie Lu'la, le rizigàri lhai dzanha ka Departamento kom lei ruzógari dxi'a ka rigítajgàri lhádziru xhin lhen guluzókane nheda ka tue fiskali buropa kie Tribunalhiní.

Lu iza 1845 gulutsaá'kane yùble diputadi kie Asamblea Departamentali, lhen nha gulhaj lha' ke gákane diputadi kom ka gulanhákane bunatxi. Dérákane bini guluyúkane nheda dxi'a lhen benha gan ga dérákane bunatxi ka gú'únkane. Na zi rizelhózi iza 1846 gulukínajkane Asamblea Departamentali kom gulazélhókane udila dérákane bini snia zakagárikane lhenhe generalhi Paredes, bini guxígàre gitxi walhàzi kie presidenti José Joaquín Herrera ga tsajakikane udila ra buza' yú lhádziru xhin, kom nha' txi ridágárikane bini amerikàni, biè didza lu yu'u xhin kie Peñasko (kie yidzi xhin kiei San Luis Potosí) lhen gudèle bubí'è zaka lhàtxi Republika ga gunhi kie' gobierni –lhen ka' benhe–, lhen buka'àn kuine lu nhákane bini nhùtsigárikane lu Partidi Monarkiko Konserbadori. Zan bini Partidi Liberali ti bigínajkane lhen ti guludide gunkane gan: nha guladzágikane dxi'a lhenkane bini nhùtsigárikane lu Partidi Santanista, lekane gulúnkane tuzi dxin gate gulukínajkane dérá gobierni xhì kie Paredes, lhen guluzókane le' tutxi'izi kamod presidenti kie Republika generalhi Mariano Salas.

Lhàtxi Lu'la gulusáyíkane udila lhenhe Paredes lhen guluzókane kuíte generalhi Juan Bautista Díaz; guluzókane juntì kie yela lí lhen tu gobierni tugiájizi ga gulakuákane tsóné bini guluzókane lekane bini lu juntì nhùtsigárikane bini bayùdxi. Kanha guka guluzókane le' Luis Fernández





del Campo, José Simeón Arteaga lhen nheda, lhen udxinha guzelòtètu runtu xtxintu gulunkane kietu. Udxì guludìdikane didza lhenhe gobierni generalhi kanhi gulabékíxbákane, le' gudèle gudíxje' gítxi ga kídxi juni línhí lhen ga túze José Simeón Arteaga yuga'anigàre lhow gobierni kie Lu'la. Nheda ralağàra yugíelá xlataja lu Fiskalia kie Tribunalhi, ga dègari lítxà ke nha' rungàra dxin, zan gobernadori Arteaga gulhekídxié' kie ga ka yulísè lei yùble lhen yazíkákane bìni, lhen ka benhe, nha' guzelhòwe rulíze yùble Fiskalia, nha bene lítxà ka presidenti o regènti, kanha lhégare dzanha bìni zógare lhow Tribunalhi kie Yelajustis kie Lu'la.

Gobierni kieru bilídze dérákani yidzi lhen bunatxi ga yuluzókane bìni re'enkane ga zíté gaka bayùdxi xtídze lhen bìni yugútsi kuinhe na yulabékíxbákane dxi'à gítxi Konstitusion kiei 1824, lhen nheda guluzókane lha' bìni Lu'la, lesnha gudela sayija lhàtxì lhàdziru xhin Republika ga gunha xtxinha yùblenhi na zi guzeló bio' disiembiri kiei iza 1846. Lu dzadonhi kun nhazlàzikane lu Republika kieru bìni zàkíkane Estados Unidos kie Ralha: gobierni kieru tibi dègari kie dumì ga yuzí'gàre lhàdziru lhen nhakìgàri bayùdxi ke Kongreso gunidzajgàrikane dérà le riyàdzajne ga gata dumì. Diputadi walhàzi kie Lu'la, Tiburcio Cañas, bizùje gítxi ga gake gobierni yuxue' dérà yú lhen le dègari kiekane bixuzi lhen bìni nhùtsikane lu yuto' ga ka gata dérà dumì lhen le iyadzajgàri na só udila. Tsatinizi gulazí'kane gítxinhi lhen guludìditekane lei lhen komisioni espesiali, ga nhùtsigàra nheda, ga bidida lei tsatinizi lhen ga gaki dérà le nazujanhi. Lu 10dza kie bio' enheri kie iza 1847 guludìdikane gítxi nuúdxì kiei, ga ka yuludìdikane kanhi nazujanhi, nha gulazelókane ribekixbákane didza. Zíté guladzàyikane guluwíkane didza lhen tsaxhini guladílakane, kom bìni Partidi Moderadi –bìni zíté nayantèrikane lu Kamara– zíté guludzágákane ga tidi dérà le nazujagàri lu gítxinhi. Na las dos kie zilhabal kie 11dza guludìdikane gata gítxinhi, le gukanha, lu gítxi nuúdxinhì;



na guluwíkane didza kiekane, bini rudzagígárikane le zían le guluzújakane lu tuwiaj artikulo kie gítxiní, kom ti re'engárikane sa' lhàdziru, ke na iruaj gítxiní, zíté tsajiga ga ti idxin gaka bayùdxi kanha re'engárikane bini lu Kongreso. Na las 10 kie zílhanha bùdxi gulabekídíxíkane kie didza ga ka tídi gítxi líní, ke kanha gunhia' ants ti bíruaj dxi'a ka re'engàritu dérátu.

Gate dzadoní dérákane bixuzi, bini txí lhen yuku bini tibi re'enkane idza' zíté gulutákane ga kwekidxíkane kiei gítxi líní lhen ga yugókane le' lu xlataje' Valentín Gómez Farías, bini nízíkane ke nhakigare bini zue' lhow Partidí Liberalí. Lhátizi dzá guladìdi lhen benkane kanhi rinàzikiekane, gulunhe ga gulayáse lhen armi bini tuntxi'igárikane ye'yi, lhengaka bini zólhengárikane lhen nhetu ni tadagárikane udila lhen ruzí'kane ga ti wíxhàj lhàdziru lhátxi ràlha lhen lhátxi Veracruz. Kanhi gulayásíkane nhí guluè lhai polkos, lhen dérà bunatxi kie lhàdziru ti gùzilhádíxíkane lhen kanha biyúkane ke ti gakíkane ilunhe gan lhen armi, gulazélhókane tungánune bunatxi lhen yaxhíkane le' generalhi Santa Anna, bini zógare lhow kiekane bini snia zajakagárikane udila lhenkane bini banhàdxi kie La Angostura lhen bini nhùsigárikane lu Partidí Liberalí zi guluzókaskane le' ka Presidenti kie Repùblika ga tibi bèni lekane sókane kontrí xtídzakane bini kiei Partidí Moderadí lhen Partidí Konserbadori; zan Santa Anna, kanha ribizikase ba gagei, buka'anhe dérákane bini siajlhegárikane lhen le' lhen bídé Mèjiku ba sniáda ga dujùe ka ilunhe gan bini rebeldi. Bini zían yajakíkane yaxhíkane le' bininhí lu Villa kienhu Guadalupí, ga biákane kie dùbì ga nudxékane rzàri lhen zurá santi ga ka gulhuwi kuìnkane ka bini zólhenkane yuto' lhen bini xàni fuero. Valentín Gómez Farías gulagókane le' lu xlàtaje ka Bisepresindeti kie Repùblika lhen guludzágákane dérà le gítxi lí ruígari kiekane yuku diputadí liberalí ga sókane ban lu siudànhí. Nhetu na'a diputadí kie Lu'la tibi guka bi si'tu le za'gàri lhàdzitu kom,



kanha tuzi gulùnhe ka gulanhákane bini bítsákane lu polkos, gulukínajkane autoridà kietu lhen gulutsákane lei lhenkane bini guluzókane bini snianhí, lhenka lu Kongresonhí tira rungárikane dxin kom tira nakuagárikane bini, nha' guxià gudéla bubí'a lidxà ga benha dxin kie le bisèdikaza.

Lu bio' agostì kie iza [1847] budxínha Lu'la. Bini liberali, tibi bèni lekane txibà ribinisagárikane lekane, kun zayajlhènkane tunhe dxin ga kwekíxbákane ga dérá yugièla dxi'a xлатаj, kom dérá lenha rudìdigàri lekane ilunhe gìtxi lí, kom dégari gìtxi lí buzujatu lu Kongreso Generalhi ga nheda lhenkane yazíke diputadi kie Lu'la ti rudìdigàritu dérá le gulunhe bini gulayáse udila lu lhàdzitu lhen ga nhetu ti runbétu autoridà guluzókane bininhí, nheda na'a zíté benha bayùdxi ga dérákani dxin gunkane bini ga gata dxi'a gítxí lí lhen ga sókane dxi'a bunatxi, kom ka yu'ulhowa ga yuzià lhen guntxi'a yelalí kieru.

Lu 23dza kie bio' nobiembiri búbitu buzòtu xлатаj dxi'a ga ti gapakane lhataj yazíke autoridànhí yulayàzikane lhàdzitu. Guxí' lu nhee gobierni presidenti kie Korte kie Yelajustis, lisensiadi Marcos Pérez, buduba Legislatura ga guluzókane nheda tutxi'izi ka gobierni kie Lu'la.

Lu 29dza kie bio'nhí gudèla xлатаja lu gobierni, lu xлатаjanhí gurià gate 12dza kie bio' agostì kie iza 1848 kom gulutsa'kane dérá bini ri'gárikane lu xlátajakane Lu'la. Nheda guluzókane yùble buropalzú tukate rálí gobierni lu konstitutsion, le bùdxi lu bio' agostì kie iza 1852 na bunhidzàjane xлатаjanhí gobierni interino Ignacio Mejía. Lu iza 1850 gutinu nigulha xhi'nhado Guadalupe na zi yu'ugáribi txopa izabi, gìtxi lí kie dzanhi ti rudìdigàri yukátxíkane bunatxi ra yuto', tuzi bini rakigàre gunhe guni nhaki gobernadori kie Lu'la, zan nheda ti gu'unha yugunha dxin lenhí rudìdigàri nheda gunha lhen guyíja yakátxídanu nigulhado xhi'inha lu bá kie San Migelhi, lhatajnhí ruga'anigàri ruruàjiniru siudà, ga ka gulhuwíkandane bunatxi ke rala gunru ka riná gìtxi lí kom zíté rubaga ga ti



gun dan yelatxí kie dérá bunatxi. Gate dzanhí, lhen kanhi rulhuwíkandane bunatxi kizikane lhen tukati bidzàga ga nhútú yukàtxi bunatxi lu ra yuto', kanha gukì ga buga'an ga dérákane bini tsakàtxigárikane bini nhati kiekane gatis lí'al kie Lu'la.

Udxi gudídi iza 1852 na bika'anha gukane gobernadori kie Lu'la, guluzókane nheda bini zue' ikiaj lhow Instituto kie Siencias lhen Artes lhen leskare bini gusèdine gìtxi lu Deretxi Sibilli. Lu dzadonhí txi gulayásigárikane udila yùble bunatxi guluè lhai rebolusion kie Jalisco, bini zógárikane kontri ka zógari lhàdziru lhen zógárikane lhenkane bini kiei Partidí Restrogradí. Nheda tibi dxin gobierni rungara, leskare gulabiénisakane nheda kleguzi bini udilanhí, leskare gulabiénisakane nheda dérákane bini benlhenkandane dxin lhen leskare yuku bini na guka gobierni gulhékikànanane lu lhataj dxi'à lu gobierni. Bininhí dxégárikane dí' dumì tunlangárikane xlatajakane ga tibi runi lekane txiba nheda zíté le gudídinda lu gobierni kia ga lekane tibi gakigari kiekane. Tibi nadxìnhìkane lhen ti bidxìn gras kiekane, ni ikiajlhókane ti nuzókane dxi'à, lesnha gulabìgatíkizikane kuite bini runhe gan, lhen tibi runigàri lekane yulabizigárikane bagíxída. Nheda tuzi le benha gukì guxhi'xhinha, lhen ti békánane gusti tidida yelastu'.

Lu 25dza kie bio' may kie iza 1853 udxinha guyíja Layidzi, ga guyíja gubàza kie gìtxi lí le rungara dxin kie le bisèda. Lu 27dza kie bio'nhí guyíja ka yidzi kie Etlá –yidzi ruga'ani zitutei kie siudà– ga yalíja gìtxi kie xtídzákane bini zógárilhenkane yidzi Teococuilco, lhen ni rungara dxindonhí, du wagubídza guladxinkane lhátiskane bini snia lhen armí gulazìnkane nheda, lhen du las dos guluúnìkane lítxà lhen yatú gìtxi ga nazuja ke rala tsíja lhixigíé lu yidzi xhin kiei Jalapa, Veracruz. Lu 28dza kie bio'nhí gulabijákane nheda bini dxégárikàneba bua' lhen gulatxe'kane nheda lhenhe Manuel Ruiz lhenka Francisco Rincón, kare nheda gayùble tsajuagárikane tuwiajkane



binidónhí anà ga bil lhàtaj ku nhaki Lu'la. Dza budapa kie bio' jùni bidxinha Tehuacan, ga nha' bulha'àkane bini gultatxe'gárikane nheda. Gatenhí gudèla bizùja gìtxi lí kanhi rusakakane nheda kom guladidine bèyi kanhí gulunhe. 25dza kie bio'nhí bidxinha Jalapa, ga ralogàri idxínkaza.

Lu yidzi xhinnhí guzua' 75dza, zan gobierni kie generalhi Santa Anna ti bika'anize kàzi nheda lhen ti bidide sua' gusti, kom ni ku gudidizi lhatizi dzá na zógára nha gulasile kia gìtxi ke ralogàri tsijà Jonacatepeque lu Estado kie Mèjiku, lekane guluzókane rson ke nheda benha ga gulutsa'kane ga rala tsija lhen lesnha guyíja Jalapa, ke nheda ti bidida gaki kanha gunhágàre gobierni bíldize nheda zàka Jonacatepeque. Kàzi gulagìlhàjlhádxi kane ga gutsa'àskane nheda, kom lu lítxà lhen gìtxi gulaxue' lu nhaa Lu'la dxí'à nazujagàri ke Jalapa nhaki lhataj ga ralogàri idxìnha. Ka gutxikànane lhen tibi didza buwekiajkane. Lekane gulunkane kia ka rusakagàriba leba bikuzùga bikuxhìlha' lu gìtxi na re'gàriba leba ke rutsa'gàritíkiziba xísba. Nheda txi nupa'àgara xkosa ga tsayíja Jonacatepeque na budxin kia gìtxi yùble ke ralogàri tsijà lu Yu'ukiaj kie Perote. Lhenga ka ti rurùjinida Jalapa ga ka tsijà ganhí gulanhákane ants na gulagixji'ikane nheda ke ralogàri tsijà Huamantla, lu yidzi xhin Puebla, nha' gudèla biruja 12dza kie bio' septiembiri; zan zítè guki bayùdxi ke rala tidigàra Puebla ga ka tsatelagàra kia lhátí dumì lhen yazika le iyàdzajda na idxìnha Huamantla, ga ti gaki bi idzilha kia tsatinizi. Udxì benha guní bugiela xniza lu 19dza; lhenga ka, zi gudidi du txi orì kie rélhanha bugiela xniza lhen duxhinhe nheda José Santa Anna –xhi'inhe Antonio– lhen gultatxe'kane nheda lhixigíe kie San José, ga gulusíjakane nheda lhen ga nhutu guludidikane guwìlhenda didza, buropa dza bubijè nheda lhenkane bini zían lhen ti bidide nu guwìlhenda didza, nha' gutxé'kane nheda lu Yu'ukiaj kie San Juan Ulúa, ga bidxinha lu 29dza kie bio'nhí. Kapitan José Isasi nhakigàre komandanti kiekane bini gultatxe'kane nheda Puebla gate Veracruz. Náyéyija lu yu'ukiajnhí nhútú guludide



guwilhenda didza gate gudidi 5dza kie bio' oktubiri na las 11 kie zílhanha, gobernadori kie Yu'ukiajnhí, Joaquín Rodal, bilhàbe didza nazujagàri ke ralogàra ixhúnaja tsijà kia tsala'a nisa Europa, udxinha bene dérá lítxà riyadzajgàrida lu yìdziluyù gayúblenha. Dzánha ti zógàra dxi'à lhen buwékija gútxàne gobernadori ke waki gunha kanha rinagàre nha, zan na udxì wakigàra dxi'a; zan le' ti bidide, nha' gutxe' nheda ke tibi rala tsayine isile nheda lu barku ingles Avon, ke ralogàra iruja ra nisato'nhí na las dos kie dzanhí, lhen tira bi bidide wékija didza, nha' le' kuine gudélé xkòsa lhen birènhe nheda lu barku nha. Lhen gunizi guka guzódxí lhen guludide gua' didza gate rélha kie 12dza kie bio' septiembiri.

9dzá guladidi bidxinha La Habana, ga gudida zían dzà gate 18dza kie bio' disiembiri –kom ka' gunàbane permisi kapitàn generalhi Cañedo–, nha bugiéla xniza zaka Nueva Orleans ga bidxinha lu 29dza kie lu mismi bio'nhí.

Guzua' lu siudànhí gate 20dza kie bio' jùni kie iza 1855, nha gudélà xniza zayíja zaka Acapulco ga yanaba txxinha lu dxin rupa'agárikane generalhi Juan Álvarez lhenhe Ignacio Comonfort kontri gobierni kie Antonio López de Santa Anna. Gudelà xniza zaka La Habana lhen lu Istmo kie Panamá lhen ká guki bidxinha ra nisa kiei Acapulco na zi ruúdxikani dzá kie bio' jùli. Le ben ga nheda yudxinha yùble guki gítxi benhe lhen gudísie Santa Anna: ke dérátu nhetu bini gulabijakane nhetu lu yìdzi ti dègàri lhataj yubi'itu lhàdzitu txiku nhetu ti guntu kanha rinenhí lhen guntu dérá le inàzikane lekane zókane lhow yìdzi. Ka bidxín lu nhaa gítxinhí, bilidzikànane zianikane bini kare nheda gulabijakane lekane lu yìdzi lhen gusila kiekane tu gítxi dérákane bini ti nakuagárikane lu siudà –ke lhadaj lítxà zían nhí, nha' txiba dé gítxinha bizuja–, ga rulidzigárikànane wàzitu lhàdzitu, ga ti guntu kanhí rinákane lhen ga ti tiditu yelastu' re'engárikane yuludide nhetu, le ralogari guntu nhaki yugútsa kuintu lu udila rupa'akane kontri gobierninhí, ga ka gata tu gobierni guzó



dxi'à bunatxi kieru lhen ga gata yelajustis, yelalí lhen ga tuzi ka rala soru ban. Kanha guki guxí lu nhakane dérákane, bininhí nhakigárikane Guadalupe Montenegro, José Dolores Zetina, Manuel Cepeda Peraza, Esteban Calderón, Melchor Ocampo, Ponciano Arriaga lhenhe José María Mata. Dérákane gulagielakane xnízikane zaka buza' yú kie Tamaulipas lhen nheda gudèla xniza zaka Acapulco.

Na zógára lhatajanhí bidxin kia didza lu bio' agosti ke Santa Anna txi bika'anigáre gobierni lhen gudele biruje lu Republika kieru, lhen ke gatsalhowi lhádziru bini zían gulunhe tuzi *Plan de Ayutla*, nha guxhí' lu nhee presidencia generalhi Martín Carrera. Zité tukate budzijanitu kanhi gukinhí lhen ti rasógari yelarudzijantu o bi guntu. Lhókas lhótu xhógari gitxín línhi lhen ti gudapakane kuidadi gudzátsikane dxi'à dérá le nazujin nha, ti guluyúkane nhux bini guluzujakane lei lhen bix re'enigárikane bininhí, bix kienha gulunhe guní lhen ga udxi dérá lenhí rigilhajlhádxíkane. Le re'engárizikane nhaki ilúnkane lani kie kanhi gukinhí, ga gapakane gusti lhen ga yulabíjákaskane lu gitxi dérá le nazuja lu gitxí línhi na guzujakane lei lu periódiko guzó lei tsutsu. Ka benhe bini ruzujagáre gitxi periódiko le' kuinhe gulhiije' gitxinhí. Nha' nheda, gudèla gudíxji'idane Diego Álvarez nhakigári bayúdxilúnkane lani kie le burùje lu gobierni Santa Anna ga ka guzóbágákane bini zókane kontrí (lhen guní gaki gata yelaudziaj kiei yelaudila), ke ti ralogári gudídikane gata gitxi línhi lhen ga ti gunbékane presidenti txi guluzógárikane, lhen kom lu mismi bini generalhi gulazélhókane udilanhí lhen bini dzá ants ni da'gárikane lhen tadzàgígárikane dxi'a le' Santa Anna –ni ridágárikane ribínisakane bini ruzógárikane tsutsu *Plan de Ayutla*–, dxí'a nhaki guyùru ke, na gulalháyíkane gudèle bixhùnije bini xanakanenhí, gudélákane gulayázikane lu udilanhí ga ka gundítájkàne lei, guntxi'ikane xtxìnkane lhen ga ti yugíxhájkàne dérá xgia' gulúnkane, ka gulùnhe gulazi'kane kiekane dérá le guladídikane bini re'engárikane idza' ka zó



Lhàdziru, lesnha gulugútsà kuinkane lu udila kwekidxi yelarusakayáyígárikàne lhàdziru bixuzi lhen bini snia' zólhengárikane le' Antonio López de Santa Anna. Diego Álvarez bidánine lhen guzíchhinhe dérá xtidza, lhen le' bidide ga nheda tidigàra ga tabijè gítxinhí zilhàbal buropa dza lhen gudzátsà lei dxi'a kom txi ribiajgárikane lei lhen gaki tsutsu, ga tidi ka gítxi dxi'a kanha ribekixbá gobierni kieru.

Generalhi Juan Álvarez, zógàre lhataj rizilhaí Texca, ga nuzógàre kuartèlhi generalhi kie, nizigàrine dxi'a dérá le rakagári udila lu Mèjiku kieru: ka blàyine gítxinhí ti bidide ga gata lhen gulísè didza ga yudubígárikàne dérákane bini zólhengárikàne lhen le' ga yulagiélakàne xnizakane zaka gatsajlhòwi lhàdziru, ga ka kwekidxiè kiei yelaudila guzelhówè le'.

Lhàtizi dza zi guladìdi bidxìnhe lu Texca Ignacio Campuzano, bini gusile le' Martín Carrera, lhen bini gusile didza ga Álvarez gunbee yelalí kiei presidenti Carrera lhen tuka nhaki bayùdxi ga dérákane bini zókane lhow bunatxi udila yuluyúkane le' ka bini xànikane. Lu dxinlhowi didza guladùbikàne guzenhágikàne le' bininhí natxiè didzanhí lhen ga nheda ka guyijà xklenhe Álvarez, nhetu dxi'a be'lhèntune didza lhen ti bidìditu gaki kanha re'engàrine Campuzano, kuìnhe yajnhí'ine ke ti nhakigàri kanha re'engàre lhen tira bubi'è tsajíe kuenti lhenhe bini guzile le'. Kànà guki gudélé xnize generalhi Álvarez lhenkane bini natxe'gàre zajakikane Mèjiku. Na guladxínhè Chilpancingo guladxìnkane ya txopakane bini nhuakane xtídzè Martín Carrera, lhen lu mismi didza nhatxé'gàre ka Campuzano: iropakane nhuagárikàne lha' didza risilagàre generalhi Carrera. Leskare bizenhágikàntune lu dxinlhowi didza, nheda ka bitsà, lhen nhakigárikàne bini walhàdzi dxi'à, gulayajnhí'íkane ke ti nhaki bayùdxi ni sue' lu xlataje gobierni Carrera kom le' kun guluzózikàne le' lu gobierni ga nhútú bini guludide kuenti, lhenga ka ti nhaki dxi'a kom guladìdine lhowl ka txi nabígárixbà kie lhàdziru lhen rala





sókane dxi'a dérè bunàtxi. Nheda gulhaj ikiajlhòwa lhen guxua' didza lu gìtxi isilàtu kie generalhì Carrera ga ti gunhe banhigi lhen gusànhe kanha re'enhe sókàze lu xlataje, kom txiba re'enhe gake gobierni riyadzajgàri gìtxi kie ke ka gulhuwí, ka yugixji'igárikàne le' bininhí gusile. Kanha guki busbí'íkàntune bininhí lhen gìtxi bizujátu, lhen Martín Carrera dxi'a gudixje ikiajlhòwe lhen bugiélè yelanabàn kieze lidxè, lu xlataje buga'anhe tue komandanti kiekane bini snia kie Lhátxí Mèjiku, tue generalhì benhe firmi gìtxi kie akta biruaj gatsajlòwi lhàdziru na zi guladidizi lhàtizi dzá buruje lu xlataje Santa Anna. Bini gusile lekane gubàza Chilpancingo Martín Carrera nhakigárikàne Isidro Olvera lhenhe bixuzi Francisco Zarco.

Bugiele xnize Álvarez zaka Iguala, ga bizùje lhen gudiziè gìtxi biè lhai *Manifiesto a la Nación* lhen guzelhòwe runhe dxin rupe'e ka rala kixbà dxin kiei yelaudila, lesnha bizue' tu konsejo ga gulakuakane tuwiajkane bini zá'gárikane lu tuwiaj yidzi xhìn nakuagàri lu Republika kieru. Nheda guluzókàne walhàzi kiei Lu'la. Konsejonhí guluzókàne lei Cuernavaca lhen gulazélòtekàne rupa'akane ga guzókàne le' Presidenti kie Republika kieru, kanha guka guluzókàne le' bunatxi generalhì Juan Álvarez, bini gudélatié guriè lu xlataje. Álvarez guzelòtékase ribekíxbè gobierni kiei, benhe le' ministri kie Relaciones Interiores lhen kiei Yazika Yidziluyù Melchor Ocampo; bini benhe le' ministri kie Yelaudila guke Ignacio Comonfort; ministri kiei Hasienda bizue le' Guillermo Prieto, lhen ministri kie Yelajustis lhen Instruksion Publika bizue' nheda. Udxinha gulagístékàne gìtxi rulidzi ga yuluzókàne diputadi kie dérá lhàtxi lhàdziru. Kanha nabékixbàgari xkugi yelaudila nhaki yuba'agari dxi'a lhàdziru lhen gata dxi'a xkugi yelalí, ga tuzi ga galikane dérákane bunatxi lhen ga yuzó ban dérá yelabunatxi, buga'ani tsowi tira yugutsi nhàkane bixuzi lu dérá le rakigàri lu yidzi, kom ka gululhuwíkàne ri'o bininhí zókàne lhen yuto', ti nizigárikane o kom bidánikane ilunhe dan, lekane kun gulùnizi kiekane Kongreso lhen ti



guludidikàne nu bi gungàri kiekane lhenka ti guludide si'kane derètxi bunatxi lhen ga yulazókàne dxi'a. Kanhi rìdidigari dza kie lhàdziru, nhakigari bayùdxi yugógàritu ke bixúzi guzó kuinkane lu gobierni, ga ka gaki kiei dxi'a lhàdziru lhen bunatxi, lhen ke na udxi izuja dérà lenhí lu gítxi Konstitucion lhen ga ka yuga'ana lu gitxí lí, ga dérákane bini yuto' tuzi ka yulazókàne –kare yazikakàne bunatxi– lhen yuladidigárikàne ka nhùtis bini yidzi na yulutsa'kane gobierni.

Generalhi Comonfort ti rugutsigàri kuine lu didzanhí kom ràdxigàre lekane bini dékiekane dumì lhen bini nanésikàne. Zíté gudìdi gulhayíne kom lu Consejo guluzókàne Iguala ti guluzókàne ni tue bini da'kane yuto', lesnha gudèle bi' lhen gunhe' ke nhakigàri bayùdxi lu Consejo yulakuagárikàne gátsajkàne bini yuto'nhí, lhen ya gátsajkàne ka yazikè bini. Leskare re'engàre ke yulazógárikàne lu xlatajkane bini udila generalhi, bini zógárikàne lhow lhen ofisialì gulazókane tsutsu gate bùdxi gurìdxì kie bini zíté benhe dan lhàdziru. Lesnha dérà bidzàgè lhen ti bidide gaka dxi'a dxin gate xlataje lu gobierninhí, na gula ori yulabékixbá dérákani dxin lhen ga yudubi dxi'a dérà gobierni kie lhàdziru, kom ti ribekixbàgàri dérà dxin rala gakigàri lu lhàdziru. Lenhí ben ga zíté gulhayine Ocampo, bini gudìde buka'anhe xlataje, lhen dérátu guxhí lu nhatu lítxè. Prieto lhen nheda ka guxótu lítxatu ga ruka'anigàritu xlatajtu; zan le zíté buriyine presidenti lhen zíté rilayigàritu tukate nhakagàri banhìgi kwekixbà gobierni lhen ka gun dxin, nha' bugiélatu yùble xlatajtu. Le zíté ben ga nheda tsiajlhènda lhen gobierninhí guki ke nhaligàri xtìdza lhen re'engàrida gapa lhataj ga selhòwa guzuja gítxi bayùdxi zíté riyàdzaj lhàdziru ga ka gaki kiei dxi'a, ka benha ga buzia' dérà le gudidikane bini lhen yidzi na gulukinajkane gobierni zíté rusakayagari lekane.

Na guladidi dza, gulasile kia tu gítxi autoridà kie Lu'la ga rulidzigárikàne nheda kom re'enkane yuluzógárikàne



nheda walhàzi kie Martín Carrera ka gobernadori kie Lu'la, lhen re'entegárikàne tsija tsatxià xлатаja; zan na'a generalhi Carrera tibi gitxi dégàri rudidi le' o guwi le' lhataj guzue bini lu gobierni, nheda busila didza ke ti si'gàri lu nhaa kom ti nhali didzanhí gate tue bini dé kie autoridá rala gune lei.

Lhátis dzá butsatu xлатаj ga ri'gàri gobierni lu siudà kie Tlalpan lhen udxinha budiditu lei gatsalòwi lhádziru, ga nhí buga'ate tsalzú.

Dérákane bunatxi gulazi'kane le' dxi'a Álvarez lhen leskare bini bayùdxi nhutsigárikàne lu partidi progresista; zan bini zíté dégari kiekane dumì, bini ti tudide sàyin lhádziru lhen bini ti nadxi'inigárikàne le' kom ti nhake bini dégàri kie dumì, kanha re'gárikàne le' lhen kom zíté bini snia' lhen bini tsutsu nhakigàre, bini ti rilayigárine dxi'a ka ribizigárikàne lekane lhen tukate tadidikane beyi, gulazélhókàne zíté rusakayákane le', gulazigidzákàne ka ribize lhen ka zue' lu yidziluyù lhen didza zi' ga ka guluzékàne lu didza lhen nhútú idxi'ini le'. Nhí gua didza kie dérá le gulunhe lhen guludidine le' dzánha Álvarez ga ka tide yelastu' lhen ga dérá bunatxi ti yulalháyikàne le' dxi'a lu yidzi.

Tú ga nadubigárikàne bini wi'a gulupa'akane kie tu lani lu Teatro Nacionali. Bini zógárikàne le' kontri gulabize ka bido' lhen ti guludide ga bini zían tsiajkane lanidohí, lhenka gulunkane ga ziani familhi ribizigárikàne ba'a ti tsajakigárikàne laninhí. Bini ba'anhí lafuers re'engárikàne iluni kiekane lhádziru lhenga ka ti zógàre tue bini gakilhenhe lhen lékane ke lu mizim Comonfort –kom tuze le' nhapagárine yelale' ga gunhe ka rinàzi kiekane bininhí–, lekane gulazelhókàne tunhe le' xhin lhen gulugu'ukane xhin lhádzidòwe ga ka inizine kuinhe bayùdxi lhen ga txàzi ikiajlhówè ke tuze le' nhake bini rala sue' lhow kom zíté benhe dxin ga kwekixbá yelaudila lhen kom dérákane bini zíté dékiekane dumì nadxi'inigárikàne le'. Bini yetxinhí tsatinizi bixje lu xtídzakàne, lhenka guyazíté' rigitije ka



rinazikiekane bininhí dérá le tudidine le' Álvarez, bini zíté bentxi'è le', kom ti gu'unhe tsiajlhenhe le' lani lu teatro gulupe'e kie. Nheda runi nheda bayùdxi gula'a didzadonhí kom lei gun yudari kixji'ida bix kienha Álvarez tutxi'izi guzue guke presidenti lhen tsatinízi gudèle buka'anhe xlataje.

Rakazi ka ants yuladxinkani dérá le yuludidikane le' Álvarez lhen ilunhe ga yuruje lu xlataje lhen ga yulutxízígárikàne le' Comonfort kamodi presidenti kie Republika, nheda gudela benha dxin ga gulhija Gítxi Lí kie ka kixbá Yelajustis kie lhàdziru. Kanhi txi ben gan yelaudila, nhakigàri bayùdxi guzóru ban dérákani didza lhen gutsàru gítxi lí rudidigàri lekane yuladidigàrikàne beyi bini runigàri kiekane lhàdziru. Dérákani gítxi lí ribekixbàgàri yelajustis kie gobierni bizujakane ants rudidigàri lekane ilunhe le rinazi kiekane, kom ruzógárikàne lhataj ga gatagàrizi justis kiekanze lekane, ga ti guludide tuzi ka galikane dère bunatxi lhen gulazue kontrì yelajustis, lhen guní gulunhe gulate' dérákane bunatxi. Kleguzi lu lhataj nhizi kie gobierni, leskare dérá yazika lhataj dégárikàni lu gobierni ralağàri idza'kani, kom ka gaki gutsàru dérá lhàdziru. Riyadzajgàrizi dxin xhin ga ka dérá ka re'engàritu kixbá gaka bayùdxi lhen só ban, lesnha nhakigàri bayùdxi guzótu, guwitu didza lhen yuka'anitu tsowi lu gabinete tu dxin ba'a kwekixbà dérá, le ku ti rudidigàri ka gaki nhaki kom gate bulhe'e Ocampo tira nakuagàritu dérátu, lhen Comonfort –bini nhakigàri xanhe– ti zògare gusti kanha rigielagàri xnízi yelaudila. Nhaza ka, gobierni kie Álvarez zíté dxenhògárikàne lei, ruzòbagagárikàne lei kom re'engárikàne guxhixhajkàne le' lhen ilunhe ga yuka'anigàre xlataje. Nhakigari zíté banhigi bi gunru dxi'a kanhi rakagàrinhí, lesnha dérákani le bizuja lu gítxi lí kie yelajustis ti gulaza'kani, tuzi le bídzağa guki ga tira gata kiekane fuero bini da'kane yuto' tugungárikàne dxin lhen bunatxi lhen buga'anizi lhati na rigu'ukane lhixigíé bunatxi, le riyadzajgàri guntu nhaki guzujatu gítxi



lí dxi'a na rizinkane bunatxi. Bini udila buluka'anzikane kiekane fuero na ribekikane xgia' lhen dérà le tadidine na runkane xtxinkane. Bugua' déràkani tribunali gulabékikàne, nha' bunidzaja kiekane bunatxi dérà dxin dumì xhógàri lu nhakane bininhí.

Na budxi bizuja gítxi lí kia –gítxi gukilhenkanbi nheda bi raban kie Lu'la liseniadi Manuel Dublán lhenhe Ignacio Mariscal–, nha' yalhuwidane gítxi línhi presidenti Juan Álvarez, bini bidide gítxinhí lhen gusile lei ga yulabiajkane ka tu gítxi lí kie dérà ka ribekixbàgàri yelajustis. Nheda bidida ga gítxi línhi yulabiajkane lei lu 23dza kie bio' nobiembiri kie iza 1855.

Gítxi línhi ni riyádzajgàri iba'a dxi'a, zan dxi'a gulazi'kane lei bini nhùtsìgàrikàne lu Partidi Progresisti. Gunhi guzelhó ràxi gi' kiei gítxi reforma le ben ga gudagu dza'a yu'u nabekigàrikàne ga rididigàrikàne beyi lhen rusakadigàrikàne bunatxi; ka guki, ka budxi, tu gítxi ruzòbagagàri lekane bini zíté dègàri kiekane dumì, lhen le ben ga generalhi Comonfort lhen dére yazike –bini ti nhapagàrikàne gusti ka ribekixbàgàri yelaudila, kom ti guladanikase yelale'kane, gu'ungàrikàne gudzágákàne dérà le txi guka na guladidi dza– bidxiga lekane ga guzókane dxizi ga tibi guki bi ilunhe kom déràkane bunatxi ka re'engàrikàne. Zan na'a, bini zíté dègàri kiekane dumì zíté gulunhe dxin ga yulagókàne le' lu xlataje generalhi Álvarez, kom bèni lekane ke Ignacio Comonfort wada'gare lekane. Gulunhe ga Manuel Doblado tsatee lekane, lhen ga kixje didza Guanajuato walhàzi dxin ba'a ants gulue lhai *Plan kie Reliçion lhen Fueros*. Bini modéradi, bini ralaçari sólhengàrikàne gobierni ga ka wixje bini zue ikiaj kiekane bini ti nazayikane, gulunhe ga Álvarez tsayajni'igàre ke le' nhapagare dùla kie yelaudila zógàri kom déràkane bunatxi ti re'engàrikàne le' sue' lu gobierni, lhen kanha riné ministri kie yelaudila –bini gulagàri sólhenhe le' lhen gunhe le' xhin– ka rulidzigàri le', bininhí gudele



yelabiniyidzi kie buka'anhe le' lu xlataje tutxi'izi Ignacio Comonfort, zan ni nakuagárikàne bini zían ruzógárikàne le' tsutsu lu gobierni; zan na'a Álvarez nhake bini zíté nadxi'inhe yidzi lhen bini tsowi, ti bidide ke xtule le' yuzelhó yùble udila lu Lhàdziru.

Ka budxi gobierni kie Álvarez, na le' buruje lu xlataje lhen ga dérátu bini nhakagàritu ministri kie buka'antu xlatajtu ka, presidenti kubi guyàzie guzélhòwe ribékixbe' gobierni kie ga bizue' lekane ministri bini, ka nízikaziru raki, nhakigárikàne bini nakuatikizikane lhen le'. Nhaki bayùdxi gula'aru didza walhàzi kiei yelanhaki dxi'a lhen kie yelajustis ke lhenkane bini nakuagárikàne lhatizikane bini nadxi'inigárikàne le' Comonfort, o kom rùnigàri lekane ke bininhí wakigàre gunhe kiei le dxi'a lhàdziru, da'gárikàne le' lhen ruyugárikàne lekane ka bini dxi'a, zan na'a bininhí nhakigárikàne bini zíté da'gárikàne yelaudila kie gusa' lhàdziru (kom ka gululhuwikane ri'o lekane ka bùdxinhí, kom dxi'a buluzi'kane lhen tukate nhàlikani xkugi rusayini yidziluyù kieru lhen yelalí); leskare nhakuagárikàne bini zían lu Partidi Liberali kamodi bini zíté runtxi'ikane xkugi rusayini yelaudila, zan ke udxinha gulatxíxine lhen guladidine yelastu' na guladide yata'kane bini ti nadxínhikane lhen bini ruzóbagakane ka zò lhàdziru. Le gukínha ni tu ni yatúkane gulabékixbákane ikiajlhókane lhen gulatxíxikane na gulabi'kane lu xlatajkane.

Gobierni kubi, kanha dérákane guluyúkane ke nhakigari dxi'a gitxi lí kie 23dza kie bio' nobiembiri, gulazikane lei lhen gulunhe dérá le nazujagári nha. Lekane gululídzikane nheda ga gunlhenkandane dxin tsijà lhen zuzaa Lu'la ga kwekixbàgàra yelalí gulagitsàjkane autoridà lhen bini nhudzagagárikàne na guzó gobierni kie generalhi Santa Anna, ga ka gútà kiekane lhataj gulundítajkàne yelaudila na gulunhe tuzi dérá le gudilhajlhàdxè generalhi Carrera, lhen kati bùdxi, lekane gulazókane kontri gitxi lí bizuja ribekixbàgàri dxi'a yelajustis. Dérá tukate nhapagara gusti ga yuzó ban gitxi línhi lhen kom bini rulidzigàrine nheda



nhake bini dègàri litxe lí, nheda kun guxía gudèla lu nhaa lhatajnhí tunigárikàne kia, lhen zi ruúdxikani dza kie bio' disiembìri bíruja Mèjiku lhenkane lhatizikane bini tsutsu guluzókane salhenkane nheda. Na rudxingàra buza' yú kie lhàdziru, dérákane bini zógárikàne kontrí nanhiagárikàne guluzódxíkane yelarílayi kiekane, lhen gulùnè xtédzakàne ke runbé'gárikàne nheda ka autoridà.

10dza kie bio' enheri kie iza 1856 bidxínhà Lu'la, lhen gudelatia' xlataja, ga generalhi José María García kun bune lei lhen tibi benhe'.

Guzelhòwa rupa'a gobierni kia rulísinda lhen rubekíxbà dérà bini guntxi'ikàne bunatxi lhen gulhekidxia' ka nadubigárikàne bini udila ni zógárikàne nha, kom bininhí kanhi nadùbigárikàne, zítè gulunhe tuzi dérà yelaudila kiekane bini zógárikàne lhow lhen bini ti dègàri gras kiekane –kamod generalhi Santa Anna– bini gulubígákàne le' kize ka lekane, kom ti gukigàre bini snia' lhe bini kize ba tsutsu ka autoridà lhen gunhè ka riná gitxi lí, lhen yelaban kie zítè bizue' gubin yelalí lhen ga derè bunatxi sókàne dxi'a. Nheda gudèla gudíxja dxi'a xlataj yelasódxì kie Lu'la kom nhakagárane gobernadori, ga ka gulhuwida bunatxi ke ti nhakigárikàni bayùdxi dérákani komandati generalhi, kom dzánhatei gunàbane gobierni kie Lu'la gukíneje lei kom ti rungàri dxin dxi'a lhen rundítajgàri ka zò lhàdziru. Ka nhakigàri, tu komandanti generalhi naxógàri lu nhee dérà bini armì, lhen le ti nhakigàre autoridà kie lhàdziru, nhakigàri tu lhàtaj ga ti rudidigárikàne lhàdziru só ka rinazi kiei lhen gata kiei yelalí, kom ti rudidigàri lekane gobernadori gapakàne autoridà lhen ga ilùnhe ga bininhí gúnkàne xtxinkane. Guluwíkàne lhákàne ka gobernadori kiekani yidzi yàlhaj, yidzi xhin lhen yidzi zó raskieí; tuzi lhainha rizigárikàne, kom nuzógárikàne lekane ka rinàzi kiekane komandanti generalhi. Kanhi nadubigárikàne batxìxi lu gobierni guki le bididi ga gúlhajkàni dérákani udila le zítè gulakua lhen gulayázkàni dzá guzó tsutsu gitxi lí Constitution kie 1824.



Zan na'a, ni nakuagárikàni la' gítxi lí ruzóbagagárikàni yu'unhí, lhenga ka gobierni kie Comonfort –rudidigàri le' yelaudila ga gunhe yelajustis– ti gúpanhe balhòri yugóe' lei, le benhe guki bidide ke gungárikàni dxin Lu'la lhen ke nheda ka gobernadori ralagàrà yuzi' lu nhaa komandansi generalhi, le nheda kun guxhí' lu nhaa ga ka tira gide yatue bini gie'nhe gutsee ka rinàzi kie, lhen nheda nizigàridà ke gobierni kie Lu'la (autoridà kie bunatxi) nhakigàre bini gake gusee lhen gunhe dxin lhatajnhí kamod yazika lhàtaj nakuagárikàni lu gobierni; zan nheda dxí'à bika'anha didza lhenkàne diputadi kie Kongreso Konstituyenti kie Lu'la ga ilùnkàne dxin dxí'à ga ka' lu Konstitusion kie Republika yulugókàne déràkani comandansi generalhi.

Lu dzá guladidínhí ti ruzòyinigárikàne Konstitusion kubi, gobierni kie Comonfort, kanha rinagari *Plan de Ayutla*, zíté nuzògàre tsutsu gobierni kie lhen yelaxhin kie kanis rizixhingárikàne le' bini yidzi kom re'engárikàne ke déràkani lhàdziru yuluzi'kani autoridà kiei na gàtà gítxi lí Konstitusion lhen kwekixbà xkugi kie yelabunatxi gulhèki yelaudila zi gudidi. Dza yelariziru bi' dxí'a kiekani dzadonhí, lhen tukate ruzó lei ban na déràkane bunatxi rASNhei lekane dérà le guladidine lhenhe Santa Anna, lenhí zíté rudidi banhigi gobierni ga gake kwekixbè yelanaban kiei yidzi, kom riyàdzajgàre yugunhe dxin lhen gape kuidadi dérà le re'engàre gunhe ga ka gake kwekídxìè dérà le rineikàne bini ti zògárikàne gusti lhen ga ti gunhe zi' ka zókàni yuku yidzi lhen kanha re'enhe yulabizi o yelarudzàgà yelalí kiei. Zan na'a, Comonfort gulhije tu gítxi lí biè lhai *Estatuto organiko* ga rutubigárine dérà yelanaban kie gobierni lhen nuzue' ga gaitxí'íkàni lu tuzu lhataj xhin rinabiè gate ga nadùbi we'enkàne polisia kiekani yidzido. Lenhí ben ga gulaxiskàne derè bini zógárikàne lhow yidzi yili kie lhàdziru. Déràkane autoridà kie Lu'la gulazókàne kontrì gítxi línhí lhen gulanábikàne kwekidxikàne dérà le nazujagàri. Tibi gulunhe ga ka' só dxì kanhi gulanabe; zan ti





guludidikàne só ban gítxi líní Lu'la kanha re'engárikàne, lhen gobierni gúpé kuidadi ga ti gaka kanha nazuja lu gítxi líní.

Lu iza (1856) guyàzie ka ministeri kie Hasienda Miguel Lerdo de Tejada, lhen guxue' lu nhee Comonfort gítxi lí ga yugókàne dérá le dégàri lhen nhuni kiekane bixuzi, zan gítxi líní ni rudidigàri lekane yuluzí'kàne dérá le ridùzi lhen le ruru'ungàri kiekane lhen tuzi le rudzàgagàri lekane nhaki ga ti yuluzí'kàne kuenti kiekani dérákani yú, zan bininhí ti guludidize kàzi: zíté guludzágikàne lhen gultákàne ga dérákàne bini yidzi yulanizikàne ke nhaki xgia' lhen ke zógárikàne kontrì yuto', le ben ga zíanikàne bini liberàli buwánikàne yulugúnkàne dxin dérá le rudidigàri lekane gítxi líní ga gakikàne yuzi'kàne kiekane gítxi kie yú lhen dumì ke bixuzi ti re'engárikàne yuzi'xhinkàne kom zíté ruzóbagagàri lekane autoridà.

Lesnha nheda gudèla benha ga gaki bayùdxi gítxi lí lhen ilunhe kanhi rinàgàri, kleguzi kun gunza kanha rinagàre autoridà, le benha guki bluikàndàne nhakixi rala gaki, lhen ga yugápákàne balòri bini ti re'engárikàne yulugunhe dxin dérá le rudidigàri lekane ilunhe dxin gítxi líní. Na'a ranhàida, nheda gunaba ilúnikàne kia 3 800 pesi, le nhaligàri tu yú'udo zógàri lu kai kie Koroneli kie lhàtxi Lu'la. Le re'engàrida nhaki gunha kanha rinàgàri gítxi reforma, lhen klegu ga dxenògàrida dumì, leinha ben ga nheda ka bugunha lei dxin. Nakuagari le zían lhàtaj nhaligárikàni dumì ga nheda tsatinìzi gapagárikàna lei, zan klegu lenhí rakagara antoji.

Lu iza 1857 gulabiájkàne gítxi lí Konstitution kie lhàdziru, lhen tsatinìzi guselhòtia runha kanha nazuja, zi'a guzélhòwa ribekixbaà ka só lhen yugitàj lhàdziru. Nheda re'engàridà ke yulazótekàni tsutsu dérá yuku yidzi yihi kie Mèjiku ga ti gunhitigárikàntu dzá, kom ràdxigáridà ke la'kani xkugi kie yelalí lhen yelausa' nazujagárikàni lu gítxi lí Konstitution generalhi, yulusbànkàni o yulabíkíkàne yùble udila gatsajlhówi lhàziru kie Republika lhen ga gie'ni



kwekidxi kiei dérá le nhali líkàni kie lhàdziru; nhakigàri bayùdxi ke dérákàni yidzi xhin nakuakàni lhàdziru ralogàri yulakuákàni xhin lhen nabékíxbà kuinkàne ga ka' ti gudidikàne, yulabekixbákàni kiei lhen yuluzókàne ban dérákani autoridà lí gulhèki Konstitution. Dérákàni yuku yidzi xhinnhí gulalháyíkàne bayùdxi yulabekixbàtèkàne gobierni kiekane lhen gulazelhòtèkàne rupa'akàne kanha nazuja lu gítxi lí lu Karti yelabayùdxi kie Republika. Lu'la gùtà kiei Konstitution, le guzélhòte run dxin, lhen walhàzi gítxi línhi nheda guluzókàne gubernadori konstitusionali kom ka gulanhakàn dérákàni yuku yidzi lhàdziru.

Nhakigàri kostumbiri rudidigàri gítxi lí kie Lu'la, leskare lu dérákàni yazika yidzi xhin kie Republika, ke na rizi'gàre xlàtaje gubernadori, bininhí rijè lhenkàne yazikè autoridà kie Lu'la tsazénhàge *Te Deum* rulagárikàne lu yuto' katedràli, ga ra yuto' ruájgárikàne bixùzi raxíkàne le'; zan na'a dzádo nha bini yuto' gulazelhókàne udila lhen dérákàne autoridà –lhen zítè dxégárikàne nheda gi' kom gulhijà gítxi lí *Ley kiei Administrasion kie Yelajustis* le gulhijà 23dza kie bio' nobiembiri kie iza 1855– lhen ruyugárikàne lekàne derè gobierni ka bini xgia' lhen bini ti nhakikàne xhi'in dìos. Dérákàne bixuzi kie Lu'la guladidikàne bèyi kom nheda zógàra lu gobierni ga ka' golutákàne ikiajlhókàne bunatxi. Gulazí'kàne gulusiájkàne puerti kiei yuto' ga ka ti yulazì'gárikàne nheda, kom bèni lekane ke nheda yugúngàra dxin bini ga txàzia lafuérzi –ga izilakanane yulasàlhajè puerti kiei yuto' bini lhen armi lhen ga yulazìnkàne lekane bixùzi– ga ka yulalháyíkàne gobierni kia ka bini xgia' o lhen yelaudila ga nhútsíkàne bini yidzi, ga ka yuluzókàne lekane bini yulazìnkàne ka bini yétxido ruzóbagákàne lekane, kom re'engárikàne ka yuzì'gàri kuinkàne. Bini zían gulagixjì'ikàne nheda kani re'engàre ilunhe kia lhen kom nusiajgárikàne yuto', tudzagagárikàne ka yu'ulhògàri, na txi gulagàri ori rala tsijà, gulagixjì'ikàne nheda dxi'à le rakigàri. Nheda txiba re'engàri txàzià tsatinizi le gunha ga sìnkàne dere bininhí



tadidibèyigàrikàne –lhen gítxi lí ni zógàri ban kiekani lani na rizi' xlatajkàne gobernadori rudidin nheda gunha ka inàzi kia–, kanha guki, ga nheda guxhíxhínha lhen buwànda tira guyija *Te Deum*: klegu kom ràdxigàrikàndane bixùzi, le rakínha gulhékiaxbà ikiajlhòwà ke déràkàne gobierni kie yidzi ti rala tsiajkàne yelalekànenha ni tu lani kie yuto', txiba lekàne ka bunatxi re'enkàne tsiajkàne yuto' waki ka ilunhe kom tibi run txiba lekane rajlhékàne lhen txiba ka ridàni lhadxidókàne. Déràkàne gobierni kie yidzi ti rala tsata'kàne bíl yuto', kom nhaki xtxinkàne guntxí'ikàne ga nhútú gútsì lhen yelalí kiekane bini yidzi lhen ga tsata'kàne bitì yu'udo re'engàrikàne, ti gakigàrikàne ilunhe dxi'a xtxinkàne txiba lekàne da'kàne tu yuto'. Kanhi gukinhí zítè bidànida kom ka' gaka gutsaà déràkàni kostumbirínhí ti nhakigàrikàni dxi'a ga derè gobernadori rajakigàrikàne dérà prosesion lhen dxin kiekani monji, ga runhitikàne dza kiekàne walhàzi ilugunhe lei dxin ga ilunhe kiei dxi'a yidzi. Nhaza ka, ke tí rala gàra tsataa yuto' lhen ti gakàne gobierni kiei yuto', le rala gàri gunha nhaki kakagàra gobierni kiekàne bini yidzi, dérà autoridà kia ruzó kuini tsutsu lhen nhaki dxi'a kom ka guxhí' lu nhaa lhenkàne bini nakuakàne lu gobierni kiei Lu'la, ka rala gàri gunha xtxinha. Lhen guní benha ga ti yulungánkàne bunatxi lhen gatenhí gulhekídxi Lu'la dérà kostumbiri ga derè autoridà kie yidzi yugútsà kuinkàne lhen yuto'. Zíani kí' kostumbiri ti nhaki nakuagàrikàni, la' le nakuagàrikàni ga yuku gobierni yulanízi xhín kuinkàne lhen ga zítè bayùdxi ribize kuinkàne, kamodi na gùtá kiekane bini zían guluntxi'ikàne le' lu lhìdxè lhen na ruwa'gàrikàne xlu'ukàne zítè nupa'akàne ga bitis dxin ilunhe lu yidzi. Na gukàne gobernadori kie Lu'la gulekidxià kiei dérà kostumbiri gulugunhe dxin xlu'ukàne lhen ga gulugúnkàne dxin lhàri ka le rakikàne yazike bini walhàdzi lhen guzua' lhìdxà ga nhútú bini lhen armi bentxi'ikàne nheda, kom nheda bizua ikiajlhòwà ke ka' gobierni yulalháyikàne le' dxi'a nhaki kom ka' rinagàri gítxi lí lhen



yelaribizi dxi'a kie, klegu kom le rugungárikàne dxin lhari dxi'a, ni le rakugárikàne bini udila kamodi lhàri tugunhe dxin lu lani kie teatro. Nheda zíté rudziajda lhen nhápá gusti kom dérákàne bini gulazue lu gobierni kie Lu'la gulabize kanhi benha nheda.



